

**MATERA ANJA WAKITÀ
UWANA POL
ATSETSER À AZLA
KORINTIYA
Première Lettre de Paul aux
Corinthiens**

Ayyi

¹ Gi Pol uwana Zəzagəla akəsàni gi, la ma-woyəŋ anja, kà gi anja magay masləlay anja Yesu Kristu, gətsetser wakità uwanay la ahəl gulo la slaka gə, anu la Sostenus, deda gami.

² Mətsetseray kà akul azlaməna masla gay Zəzagəla, uwana la Korintiya, azlauwana matsa-tsamani atə gə, kà atə anja madz à ahəŋ kà ahəl anja Zəzagəla Baba, ŋgaha uwana azlaanə la Yesu Kristu la abà, ŋgaha azlauwana tatsəl sləm anja Sufəl gami Yesu Kristu à gay gesina, uwana Sufəl gami babay suwan. ³ Zəzagəla Baba gami, la Sufəl Yesu Kristu tapis à akul à gay à vok la mav à akul lapiya.

Tatak dzəba anja səla aw gə, uwana tabəzal la Korintiya

⁴ Kikay gəgod à Zəzagəla gulo koksikoksi lakəl ankul, kà vok mahamay uwana avà à akul la Yesu Kristu la abà. ⁵ Ama la maham gay à vok ankul la abà la Yesu Kristu, kabəzàw à gəl la azlatatak delga delga gə uwana la abà, tavà à akul gesina, haday, la azlamavəy anja tatak,

aṅa gay aṅha, ṅgaha la masəlay aṅha gesina. ⁶ Ndzer, gay lakəl aṅa Kristu uwana tazəṅ kà, adàla slilih la akul la abà. ⁷ Kà uwaga mavəy aṅa Zəzagəla gesina kabəzəwwal, akul uwana kakudaw kaslà mas à waṅ aṅa Sufəl gami Yesu Kristu. ⁸ Masla kà aga la ahəṅ azlaka akul, kà akul magay matsizl à ahəṅ gə tsərah à mavakay uwatà, kà dza aṅa mabəz tetəvi aṅa masləh akul à vok, la vuɸ seriya aṅha aw. ⁹ Zəzagəla la gəl aṅha, la uwana azalà akul, kà akul magay tekula la Kona aṅha la abà, Yesu Kristu, Sufəl gami. Zəzagəla la uwana dziriga.

Mavəhla la tataka azlaməna madiṅal gəl à vok

¹⁰ Azladedə gulo, gədəv à akul kuɸa la sləm aṅa Sufəl gami Yesu Kristu: Dzəw à ahəṅ la matsən vok gay la abà, mavəhla apaka vok la tataka aṅkul la abà aw, gəw la maham gay à vok la abà, la madzugway tekula la abà ṅgaha la paṅaw tekula. ¹¹ Azladedə gulo, gəpəh à akul kiya uwanay kà, kà uwana azlaməna huɸ gəy aṅa Kəlowe, misga, tasà à waṅ kà mapəh à gi kà magazlay la ahəṅ la tataka aṅkul la abà, tagòɸ à gi. ¹² Uwana gəpəh à akul uwanay kà, kà uwana kəla uwabeyuwi aṅkul kà, apəhay kà paṅaw gərgər. Anik agod: ‘Gi aṅa Pol’, anik: ‘Gi aṅa Apolos’, anik aya: ‘Gi aṅa Piyer’, ṅgaha anik aya: ‘Gi aṅa Kristu’. ¹³ ṅgaha ma, kadzugwaw ma, vok aṅa Kristu ma aslaha vok ala gərgər dəṅ, kagodəw takay? Awma Pol la uwana aməts à ahəf à adi kà aṅkul takay? Awma tadəhəkulla batem la sləm aṅa Pol kəla ay? ¹⁴ Kay, kikay

gəgodfay à Zəzagəla, kà uwana gədfahà batem à dza aw, say Kirəspus atà la Gayyus pəra. ¹⁵ Nğaha à dza agədfiŋ à afik kà adfahà batem la sləm gulo aw. ¹⁶ Iyay, hadfay təga, avikà gi, gədfahà batem à huf gày aŋa Estefanas təga, ama gədfahàn à dza anik aya, gəl agod à gi aw. ¹⁷ Ama gi kà, Zəzagəla asləl gi à waŋ kà madfah batem aw, asləl gi à waŋ kà maz gay marabəŋ, ŋgaha gəzəŋ kà la kokuda haŋkəli aŋa sləb vok, ŋgaha gi aŋa mapəsew mamətsay aŋa Kristu la ahàf à adi aw.

Ndzədfa aŋa Zəzagəla la matsihila aŋha

¹⁸ Gay lakəl aŋa maməts à ahàf à adi aŋa Kristu apakà bokuba tatak deyday la huma yewdi aŋa azladza, uwana takəs tetəvi aŋa gày akəl. Ama kà aŋami uwana Zəzagəla abəl anu kà, məsəl kà gay uwaga kà la ndzədfa aŋa Zəzagəla. ¹⁹ Bokuba uwana tatsətsər à wakitə Zəzagəla à abà, agodf kà: “Gədəkalàh haŋkəli aŋa azlaməna masəl tatak à ahəŋ, gədawits masəlay aŋa azlaməna matsihila ala.”[✧] ²⁰ Tsa kiya uwaga ma, mana azlaməna haŋkəli tapəhay aya zlà ma? Baŋaw azladza mawur gəl gə, la azlaməna mats gay la gudəŋ uwanay la vok ma? Zəzagəla apəhla ala kà, masəlay aŋa gudəŋ à vok uwanay kà magay kusoŋu.[✧] ²¹ Azladza gudəŋ à vok la haŋkəli, tanəŋa tatak uwana Zəzagəla adfahàn la matsihila aŋha, ama tasəl masla aw. Gay gə la uwaga à uwana, Zəzagəla adfahla sləray la azlagay uwana məpəhay, kà uwana atà tagodf

✧ **1:19** 1.19 Yesayya 29.14 ✧ **1:20** 1.20 Job 12.17; Yesayya 19.12; 33.18; 44.25

kà: “Uwanay kà azlatatak kusoŋu gà pəra.” Zəzagəla akəs kà uwaga kà, mabəl azlauwana tadin gəl à masla à vok. ²² Azla Yahudiya kà, asa à atà manəŋ azlanadzipo, ŋgaha kà atà aŋa masəlay kà sayda gami kà dziriga. Azla Gərək kà, tayàh kà atà masəl Zəzagəla la aslasl gəl aŋatà. ²³ Kà aŋami kà, məziŋ kà lakəl aŋa Yesu Kristu uwana tazləl à ahàf à adi. Baŋa azla Yahudiya tatsən uwaga kà, azin à atà à gəl, ŋgaha azladza anik kà tagoɸ: “Kà gay kusoŋu!” ²⁴ Ama azladza uwana Zəzagəla atsatsàmàni atà, kà atà aŋa magay azlaaŋha kà, amiyaka tadagay azla Yahudiya, amiyaka tadagay azlatsəhay azla Yahudiya aw bay, kà aŋatà kà, gay uwanay kà gay deyday aw, kà uwana tasəl kà Yesu Kristu kà apəhla ndzəɸa aŋa Zəzagəla la matsihila aŋha ala babay. ²⁵ Azlaanik tagoɸ kà, uwana Zəzagəla aɸahàŋ kà kusoŋu, ama tasəl kà kusoŋu uwaga aɸuwa haŋkəli aŋa dza la kaykay aw. Tadzugw kà guɸguɸ uwaga aɸuwa ndzəɸa aŋatà la kaykay gesina aw.

²⁶ Azladedə, nərəzàw gəl aŋkul, akul uwana Zəzagəla azalà akul tsi. La yewdi aŋa azladza kà akul məna makor haŋkəli, la maslay, la masləkaway la ahəŋ məŋga aw. ²⁷ Ama Zəzagəla atsatsàmàni azlauwana azladza tazalà à atà ala azlakusoŋu, kà atà aŋa makəl ziruwi à azlamatsihila gə à gəl. Atsatsàmàni azlaguɸ-guɸga, kà makəl ziruwi à azlandzəɸa-ndzəɸaga aŋa gudəŋ à vok uwanay à gəl. ²⁸ Atsatsàmàni aya azlauwana, azladza gudəŋ à vok tanəŋà atà bokuba azlatatak mapəsew atà gə, kà atà

makəl ziruwı à azlaməŋga à gəl. ²⁹ Kiya uwaga kà dza la ahəŋ: 'Gi', agodfay la huma Zəzagəla kà mats zlapay aw. ³⁰ Ama akul kà, Zəzagəla azalà akul, kà maham gay à vok la Yesu Kristu la abà. Kà uwana Kristu la uwana aga matsihila gami, uwana asà à ahəŋ la zagəla la afik, mədapaka azladza aŋa Zəzagəla, sà sətaka adagay, mədapəlla la ndzəda aŋa mamətsay la abà babay. ³¹ Asa à Zəzagəla kà uwaga apakà vok bokuba uwana tatsetsèr à wakità aŋha à abà:
'Baŋa dza asal mats zlapay kà, atsa zlapay kà, kà azlatatak uwana Zəzagəla adfahəŋ.'[☆]

2

Gay uwana Pol azəŋ la Korintiya

¹ Azladedə gulo, uwarà uwana gədà à awtəy kà maz à akul ala gay mahədəŋ à ahəŋ gə, uwana Sufəl Zəzagəla afətà à anu à ama ala, gəpəh uwaga la azlagay namnamga aw, ŋgaha babay gəpəh la haŋkəli aŋa dza aw. ² La kaslā uwana gədà à mtəga aŋkul kà, gəgədəŋ à afik kà gi aŋa mapəhay kà lakəl aŋa Yesu Kristu pəra, gədapəhay lakəl aŋa azlatatak anik aw, ama gəpəh kà lakəl aŋa mamətsay, uwana aməts à ahəf à adi pəra. ³ Mok uwana gəgə la Korintiya, gəgə guḅguḅ, guba akàs gi, gəsukùlāh. ⁴ Mapəh gay Zəzagəla gulo la sayda gulo uwana gəzəŋ kà, agà kà la maslay aŋa azladza aŋa gudəŋ à vok aw. Ama la mapəhla ala aŋa Masasədok Zəzagəla, ŋgaha la maslay aŋha, ⁵ kà madiŋal

☆ **1:31** 1.31 Yeremiya 9.24

gəl à vok aṅkul aṅa matsizl à masəlay aṅa azladza à afik aw, say à maslay aṅa Zəzagəla à afik pəra.

Matsihila aṅa Zəzagəla

⁶ Aṅa azladza uwana tasafay la tetəvi aṅa Zəzagəla la tsəh, gətəpakulla matsihila dziriga à uwana haṅkəli aṅa gudəṅ à vok uwanay aw, ṅgaha haṅkəli aṅa azlaməna makoray la gudəṅ à vok uwanay, uwana tadəmats à gay aw.

⁷ Matsihila uwana gəpəhay kà, matsihila aṅa Zəzagəla. Uwaga kà tatak mahad vok à ahəṅ gə, uwana Zəzagəla atsatsəmənì dagay uwarà, à mok uwana gudəṅ à vok uwaga la ahəṅ dən aw, kà anu aṅa mad à slaka mazləbay aṅha à abà. ⁸ Aga la ahəṅ, amiyaka tekula, la tataka aṅa azlaməna makor gudəṅ à vok uwanay la abà, asəl uwaga tetuwa aw. Agay tasəlay kà, anaka tazləl Sufəl gami, uwana la mazləbay, à ahəf à adi kà makəfay aw. ⁹ Ama bokuba uwana tatsetsèr à wakità Zəzagəla à abà, la uwana adahəṅ:

'Uwana dza adanəṅəṅ adatsənəṅ didi aw, tatak uwana adada à aresl aṅa dza à abà dadən aw, la uwana Zəzagəla adahəṅ à ahəṅ, kà aṅa azlauwana tawoya masla.'

¹⁰ Haday, anu la uwana Zəzagəla apəhanula nasiri uwaga la Masasəfok tsikasla aṅha. Ndzer Masasəfok aslala vok aṅa masəl madzugway aṅa Zəzagəla uwana la gəl aṅha la afik. ¹¹ Ama dza asəl uwana dza anik adzugway aw, say masasəfok aṅa dza uwatà pəra asəl. Kiya uwaga babay, dza la ahəṅ asəl madzugway aṅa

Zəzagəla aw, say Masasəđok Zəzagəla kokufə gəl aᅇha pəra asəl. ¹² Anu la Masasəđok, uwana gudəᅇ à vok avà à anu aw, asà à ahəᅇj kà la slaka Zəzagəla. Zəzagəla la uwana asləl à anu uwaga à ahəᅇj la gəl aᅇha, kà anu aᅇa masəl dèwdèw tatak uwana avà à anu gesina. ¹³ Gi kà, gəpəᅇh gay uwana azladza tapəᅇhgəla aw. Ama gəpəᅇh à akul, kà uwana Masasəđok Zəzagəla apəᅇh à gi. Nᅇaha gətəpla à azlauwana tatsəb sləm à Masasəđok uwaga.

¹⁴ Dza uwana la Masasəđok Zəzagəla aw kà, aslala vok aᅇa maᅇəz dziriga aᅇa Masasəđok uwaga aw. Kà aᅇha kà, uwaga apakà kà bokuba azlatatak kusoᅇu gə, masla aslala vok aᅇa matsən godega aᅇatà aw, say la mazlakay aᅇa Masasəđok la uwana atsenəᅇ. ¹⁵ Dza uwana la Masasəđok Zəzagəla, aslala vok aᅇa mavəᅇh tatak gesina ala, ama dza aslala vok aᅇa madahalla seriya à gəl aw. ¹⁶ Bokuba uwana tatsetsèr à wakità Zəzagəla à abà:

'Uwa à uwana asəl madzugway aᅇa Sufəl Zəzagəla uwa? Uwa à uwana aslala vok aᅇa mawulla ala matsihila uwa? Ama anu, anu la madzugway aᅇa Kristu.'☆

3

Mavəᅇhla kà delga aw

¹ la dziriga azladedə gulo, mok uwana gi la Korintiya, gəslàla vok aᅇa mapəᅇh à akul bokuba uwana gəpəᅇhay à azladza, uwana la Masasəđok Zəzagəla aw. Gəpəᅇh à akul kà bokuba uwana

☆ 2:16 2.16 Yesayya 40.13

gəpəh à azladza gudəŋ à vok, bokuba azlabəza uwana la madiŋal gəl à vok la abà. ² Kà uwaga à uwana, gəvəhà à akul kà awà, awkà tatak may dzaŋdzaŋga aw, kà uwana la mok uwaga kà kaslāw dadəŋ aw. Bə lagonay babay kà, kaslaw aw. ³ Kà uwana tsərəh à lakana kà, kanəfaw kà madəhəŋ aŋa gudəŋ à vok. Kadəhaw vok maŋor à vok, kagazlahaw, tsa baŋa kiya uwaga ma, kanəfaw kà madəhəŋ aŋa gudəŋ à vok kiya aŋa azladza anik aw takay? ⁴ Baŋa dza agod: ‘Gi aŋa Pol’, dza anik aya: ‘Gi aŋa Apolos’, uwaga kà manəf madəhəŋ aŋa azladza aw takay?

⁵ Uwa Apolos uwa? Nŋaha ma, gi Pol ma gi uwa? Anu səla nna, kà anu azlaməna sləray aŋa Zəzagəla pəra, uwana Zəzagəla asləl à akul atà à waŋ, kà akul aŋa madiŋ gəl à Kristu à vok. Anu kà mədəh sləray uwana: ‘Dahəwwaŋ’, Zəzagəla agòd à anu. ⁶ Gi gəsləkà, Apolos atədal iyaw, ama Zəzagəla la uwana azigəŋ uwaga. ⁷ Hadəy, dza uwana asləkay, la dza uwana atədal iyaw kà, atà tasla tatak aw, Zəzagəla la uwana asla tatak, kà uwana masla la uwana azigəŋ uwaga. ⁸ Dza uwana asləka, la dza uwana atədal iyaw kà, atà kà kalkal. Zəzagəla adavà à kəla uwabe-yuwi aŋatà masik aŋa sləray, la madəhəŋ aŋha uwana adəhəŋ, ⁹ anu kà anu tekula la sləray aŋa Zəzagəla la abà, ama akul kà, akul kà bokuba guf uwana Zəzagəla apəsay.

Nŋaha aya kà, akul bokuba gəy, uwana Zəzagəla aŋalay. ¹⁰ La maslay uwana Zəzagəla avà à gi, gədzəkà la sləray la slaka aŋkul. Gəgà bokuba dza uwana aŋal gəy, uwana asəl

maf matatukway à ahəŋ lela. Gətatəkwàŋ lela, lagonay azladza anik taŋal gày uwaga. Delga kà azlauwana taŋalay, tadfàh haŋkəli kà atà aŋa maŋal gày lela. ¹¹ Zəzagəla afà Kristu à ahəŋ kà bokuba masla la uwana matatukway. Dza aslala vok aŋa madfàh matatəkw gày anik aya aw. ¹² La matatukway uwatà la gay, azladza tadzəkà maŋalahal à gày, azladza anik la luwà-luwà, azlaanik la gursu, azlaanik la azlaakur uwana sləm aŋatà la ahəŋ kà maŋalàhla à matatukway uwaga à gay. Azlaanik tadehəŋ la azlaahàf, azlaanik la kəsaf, ŋgaha azlaanik la veviz. ¹³ Ama kəla sləray aŋa uwabeyuwi adàpəhla vok ala la huma seriya, kà uwana la mavakay uwatà la uwana, Zəzagəla adəgur sləray aŋa uwabeyuwi la akəl, ŋgaha anu la gəl gami mədànəŋ sləray gami à baŋa delga. ¹⁴ Baŋa dza aŋal à matatukway uwana à gay, ŋgaha atəf akəl la gay ala kà, dza uwatà adàbəza masik aŋha. ¹⁵ Ama baŋa dza uwana akəl apədf sləray aŋha à gay kà, dza uwatà kà, adàbəza masik aŋha aw, ama masla la gəl aŋha kà adàbəlay, ama bokuba dza uwana atəfa à akəl la gay ala la zlahha à masla.

Məŋ gày aŋa Zəzagəla

¹⁶ Kasəlaw kà akul kà kagaw bokuba məŋ gày Zəzagəla, à uwana Masasəfok Zəzagəla adzà à ahəŋ la aku aw takay? ¹⁷ Iyay zlà, baŋa dza akal məŋ gày Zəzagəla à ahəŋ kà, Zəzagəla adàkalah dza uwaga à ahəŋ suwaŋ. Kà uwana məŋ gày Zəzagəla kà tsidəŋa, ŋgaha məŋ gày Zəzagəla kà akul.

¹⁸ Tsa kità zlà kà, dza avavara gəl aŋha zlà ma aw! Baŋa dza la tataka aŋkul la abà, asal aŋa magay masla haŋkəli aŋa gudəŋ à vok uwanay kà, say agay bokuba dza masəl tatak aw gà dadəŋ, la uwana agay masla haŋkəli la tetəvi dziriga la ama. ¹⁹ Uwana gəpəh kiya uwanay kà, azlatatak uwana azladza gudəŋ à vok uwanay asa à atà magay la haŋkəli, uwaga kà, azlatatak deyday la yewdi aŋa Zəzagəla pəra. Uwaga kà bokuba uwana tatsetsər à wakità Zəzagəla à abà, tagòd kà:

'Zəzagəla adàbəza azlamatsihilaga uwaga à tsəh la dəmdəm aŋatà la abà.'☆

²⁰ La slaka anik babay aya kà, tatsetsər kà:

'Zəzagəla asəl madzugway aŋa azladza, asəl kà deyday.'☆

²¹ Kà uwaga à uwana gəgòd à akul kà: Dza atsa zlapay la dza anik la afik aw, kà uwana azlatatak gesina kà, akul kakoraw. ²² Gi Pol, Apolos, Piyer, anu gesina gami kà, anu azlaaŋkul. Amiyaka azlatatak lakana, la azlauwana taləg aw à waŋ la huma la gay gesina kà, azlaaŋkul. ²³ Akul kà, akul azlaaŋa Kristu, ŋgaha Kristu babay kà aŋa Zəzagəla.

4

Azlaməna masləlay aŋa Kristu

¹ Asa à gi kà azladza tasəlay kà anu azlaməna sayda aŋa Yesu Kristu, kà anu azlaməna sləray aŋha. Zəzagəla afà à anu nasiri dziriga aŋha uwana à ahəl uwarà, kà anu aŋa masəlla à

☆ **3:19** 3.19 Job 5.13 ☆ **3:20** 3.20 Mahabay 94.11

udaka ala. ² Akul kà, sèlàw uwaga adagay, dza, uwana mənə dza afal tatak à ahəl kà, masla kà say dza dziriga pəra. ³ Kà anjulo kà, baməraka kakəlaw gi gay à vok, bay kà dagədawali gəgoday aw, amiyaka bà azladza takəl gi gay à vok lakəl anja azlatatak anik anik babay kà dagədawali, gəgoday aw. Bà gi babay kà, gəđàh seriya anja gəl gulo aw. ⁴ Gəsəl tatak mawisiga gulo dadən aw. Ama uwaga asal magoday kà, gi sətaka dadən magay aw. Sufəl Zəzagəla la uwana masla mađàh à gi seriya à gəl pəra. ⁵ Kà uwaga kà, kadəhaw seriya à azladza à gəl dadən aw, say kakudaw mavakay uwana Zəzagəla akədəv à ahən dadən. La vud uwana Sufəl Kristu adəzlanjalay, adəsəlla à uda à udaka ala azlatatak uwana la mələs la abà lakana. Uwana azladza tadzugway la ləv anjatà la tsəh kà, adəsəlla à uda babay. Kiya uwaga kà, Zəzagəla adəzləb kəla uwabeyuwi lakəl anja sləray anja uwana adəhən. Baña dza adəhən mənəga, azləb masla mənəga suwan, ama baña dza adəhən kay aw, mazləbay atsəhal suwan.

⁶ Azladedə gulo kà, akul la uwana gəpəh uwaga gesina, lakəl gulo, nğaha lakəl anja Apolos. Asa à gi kà kasəlaw la slaka gami uwana gay uwanay asal magoday. Dza atsəd à makwi uwana lakəl ala tatsetsər aw: Dza anik ankul akədəd à dza anik à ahən, nğaha kà mapəseyay dza anik. ⁷ Kak uwana: ‘Gəđuwa azladza anik’, kagod, kak uwa? Awma Zəzagəla la uwana avà à ka azlatatak uwaga gesina aw takay? Baña Zəzagəla la uwana avà à ka uwaga, ma kà mana katsala zlapay zlà ma? Kà mana kagod kà:

Gəbəzə uwaga kà la aslasl gəl gulo zlà ma?

⁸ Kayyà, kadaḅəzaw tatak gesina. Akul azlagorobu adagay la tetəvi aṇa Zəzagəla la tsəh, kazàwàw sufəl, bə amiyaka anu kà mədàzuw sufəl dadəṇ aw. Naka agay delga à baṇa akul azlasufəl ndzer, la yewdi aṇa Zəzagəla, ṇgaha anu azlaməna maz gay aṇha məpakəh azlasufəl babay suwaṇ. ⁹ Ama anu azlaməna masəlay kà, gədzugw kà Zəzagəla kà adagolla anu la lig. Anu kà mədagay kà bokuba azladza uwana seriya mamətsay adatəf à atà à gəl, la yewdi aṇa azladza la vadavaday la afik. Bokuba marəzlay uwana azladza gesina tanəṇaṇ gesina la gudəṇ uwanay la vok, la slaka azladza, ṇgaha la slaka azlamalika babay. ¹⁰ Azladza tadzugw kà anu azlakusonju, tagodf, kà uwana məz gay lakəl aṇa Yesu Kristu. Ama kà akul kà, azlamatsihilaga, kà uwana kahaməw gay à vok la Kristu. Anu kà, azladza tadzugw kà anu azlaguḅguḅ, ama akul kà, akul azlandzəḍa ndzəḍa. Anu kà azladza tapəsew anu, ama akul kà, azladza tasləkaw akul. ¹¹ Tsəràh à lakana may la nəlay aza anu babay, lukut aga anu la vok babay aw, ṇgaha tazlabəh anu aya, ṇgaha gəy gami la ahəṇ aw. ¹² Məḍəh sləray kà aṇuf dà à uda la guday, kà mazlakla gəl gami, la mok uwana azladza tadzək à anu magodəhay à gəl kà, mədəv kufa à Zəzagəla kà mapis atà à gay à vok. La mok uwana azladza tatərəḅ anu babay kà, məbasiṇ. ¹³ La mok uwana tatugw à anu gay mawisiga à vok kà, məwulatàla kà la ləv tələmma. Tapakənula lagonay kà bokuba anu azlaələh aṇa gudəṇ à vok, bə tsəràh à lakana

babay kà bokuba anu azlahuyiv aña gudəŋ à vok uwanay.

¹⁴ Uwana gətsetser kiya uwanay kà, kà aña makəlakulla ziruwı à gəl lakəl aña uwana kadà-hàwwàŋ, gəgod magay aw. Uwana gətsetser à akul uwanay kà, kà gi aña masləhakulla vok pəra, akul azlabəza gay ləv gulo. ¹⁵ Amiyaka baña kabəzaw azlaməna matapakulla dəbow kulo, azlauwana tadala akul la tetəvi aña Kristu la ama, baba aŋkul kà bə tekula pəra. La mok uwana gəsa à akul ala sifa uwana kahamaw à gay à vok la Yesu Kristu la abà. ¹⁶ Kà uwaga à uwana gədəv à akul kuda: Kamkam pakaw bokuba gi. ¹⁷ Kà uwaga à uwana gəsləl Timotawus à slaka aŋkul babay. Masla kà bəzi gay ləv gulo, uwana ahoy yewdi aña Sufəl Zəzagəla. Masla adəwulakulla azlatatak uwana à gəl, gəpəhakulla la tetəvi aña azlaməna manəf Yesu la tsəh, la tataka azlaməna madıŋal gəl à vok la abà gesina.

¹⁸ Azladza anik anik la tataka azladza aŋkul la abà tats zlapay, tadzugw kà, gəda à awtày aya aw, gəl agod à atà. ¹⁹ Ama baña asa à Sufəl Zəzagəla kà, gəda à awtày kà nekwa. Baña gədàda à awtày, asa à gi aña masəl azlaməna zlapay uwaga, ama gay aŋatə pəra aw, ama maslay aña ndzəda aŋatə babay. ²⁰ Kà uwana makoray aña Zəzagəla kà aña gay pəra aw, ama la ndzəda aña Zəzagəla. ²¹ Mana à uwana asa à akul lagwa ma? Gəda à awtày ma la azəva la ahəl ay, awma la masal ŋgaha la ləv tələmma ay?

5

Makudək masla mabila gà à uda la maham gay à vok

la azlaməna gay Zəzagəla

¹ Kəla slaka gesina gətsən tapəhay gay lakəl aña mabila uwana la tataka aņkul la abà, mabila uwana amiyaka azlauwana tasəl Zəzagəla aw bay kà, tadehəŋ aw. Gətsənəŋ azladza tapəhay kà dza anik la tataka aņkul la abà kà, adabəđ mis aña baba aňha à gəl.* ² Ngaha aya kà, akul azlazlapay aya! Kayyà, ŋuləm naka kagaw la mazaw la gəl la abà, ŋgaha zil uwana adàh tsəhay gə uwaga la tataka aņkul la abà kà, kəsaw à uda la tataka aņkul la abà. ³ Gi kà kərkər la akul la sləb vok la abà, ama la masasəđok la abà kà, gi nekwa la akul, ŋgaha gədadàh seriya à dza, uwana adàh tsəhay sləray mawisiga uwaga la tataka aņkul la abà à gəl bokuba gi nekwa la akul. ⁴ Gədadəv seriya uwaga à gay, la sləm aña Sufəl gami Yesu. Gəgod à akul kà, la mok uwana kadàhamaw gay à vok kà, madzugway gulo adàgay la tataka aņkul la abà, ŋgaha ndzəfa aña Sufəl gami Yesu adàgay la tataka aņkul la abà babay. ⁵ La mok uwana kahamaw gay à vok kà, vaw dza uwaga à ahəl aña seteni, kà seteni aña mawisəŋ ala. Kà uwana seteni kà, aga la ndzəfa kà lakəl aña sləb vok pəra. Ngaha Zəzagəla adàbəl masasəđok aňha, la makəđ gəl à ahəŋ, aña mavakay uwana Sufəl adàwul à waŋ.

* 5:1 5.1 5Musa 22.30

⁶ Tatak la ahəŋ, à uwana katsawla zlapay aw. Kasəlaw kà tatak makəsl tatak ŋuv, akəsl magol pèhàw à gay aw uwà? ⁷ Zèbàw tatak makəsl tatak maviyaga à uda la tataka aŋkul la abà, uwaga kà tsakana, kà akul aŋa magay sətaka kokufa tsakana. Gàw kalkal bokuba pəhaw mawga uwana tatak makəslin la tsəh aw, kiya uwaga à uwana kagaw, kà uwana Kristu magadzaw aŋa madəvaday Paska aga makəfayga kà aŋami.✧ ⁸ Kità kà, məhab madəvaday Paska. Ama mətà Pain la tatak makəslin aw, məgà kuzakaka, mənəfà tetəvi aŋa Zəzagəla la ləv tekula. Məsək azlatatak mawisiga, uwana taga bokuba azlatatak makəslin, uwaga kà tsakana, ŋgaha kà mabila. Ama mətà Pain la tatak makəslin aw, uwaga Pain aŋa sətaka, ŋgaha aŋa dziriga.✧

⁹ La teraŋa aŋa wakità gulo, uwana la abà gətsetsèr à akul kà, gəgòd à akul kà: ‘Kahamaw gay à vok aw la azladza uwana tadza à ahəŋ la mabila la abà aw’, gəgòd à akul. ¹⁰ Baŋa gəpəh kiya uwanay kà, gəpəhay kà azladza uwana tasəl Zəzagəla aw, kagodaw aw. Awan, ama gəpəhay kà akul uwana kasəlaw. Azladza uwana tadàh mabila, la azlaməna mawoy tatak aŋa azladza anik, la azlaməna madàh gəl, la azlaməna manəf mazlazlay, uwana à ahəŋ la gudəŋ la vok, məhəlla à ahəŋ kà azlatatak uwaga gesina, ŋuləm mas à uda la gudəŋ à vok uwanay la abà. ¹¹ Asa à gi kà magod à akul kà: ‘Kahamaw gay à vok la azlatsəhay

✧ 5:7 5.7 2Musa 12.5 ✧ 5:8 5.8 2Musa 13.7; 5Musa 16.3

dza uwaga aw'. Baṅa dza agodf kà: 'Gi masla madiṅal gəl à vok', ama adfàh mabila, baṅaw masla agay masla mawoy tatak aṅa azladza anik, baṅaw masla manəf mazlazlay, baṅaw masla agay masla matsak magodahay à azladza anik à gəl, baṅaw agay masla guzu, ṅgaha agay masla gəl, kadzaw à ahəṅ la slaka gà la masla aw, amiyaka tatak may bay kà, kazuwaw la slaka gà aw.

¹² Gi kà gəslala vok aṅa madfàh seriya à azlaməna à uda à gəl aw, akul kadahaw seriya kà azlaməna huɗf gày à gəl. ¹³ Kà uwana azlaməna à uda kà, Zəzagəla la uwana adàcfaha à atà seriya à gəl. Kudəkàw à uda dza uwana adfàh mawisiga la tataka aṅkul la abà, bokuba uwana wakità Zəzagəla apəhay.*

6

Kapaw gudzi à masla madiṅal gəl à vok à gəl la huma azladza à uda aw

¹ Baṅa dza la tataka aṅkul la abà tabay vok gay la dza anik, ma delga à baṅa apuwla gudzi à gəl kà la huma azladza uwana tasəl Zəzagəla aw takay? Akəsa à vok kà apuwla gudzi à gəl kà la huma aṅa azlaməna madiṅal gəl à vok. ² Kasəlaw kà, azladza aṅa Zəzagəla la uwana tadàcfah seriya à azladza gudəṅ à vok uwanay à gəl aw takay? Iyay, haɗfay zlà, baṅa ndzer kadàcfahaw seriya à gudəṅ à vok uwanay à gəl ma, kakay, kaslawwalla vok aṅa matàh azlabəza gay uwana ala la tataka aṅkul la abà aw zlà ma?

* 5:13 5.13 5Musa 13.5; 17.7

³ Kasəlaw babay kà mədàcfah seriya à azlamalika à gəl aw takay? Tsa kiya uwaga, ma baməraka azlatatak bəzaga aña gudəŋ à vok uwanay zla ama uwà? ⁴ Ama akul, baña akul la magazlay lakəl aña tatak anik la tataka aŋkul la abà ma, kakay kaslawwalla vok aña mapəh tatak uwaga à azlaməna à uda, uwana atà la matsən vok à gay anina aw ma, kà atà aña madfàh seriya aña tatak uwaga ma? ⁵ Ziruwi aza à akul aw takay? Aga la ahəŋ la tataka aŋkul la abà à bà dza haŋkəli gə, bà tekula aña matahàh azlabəza gay uwana alaa la tataka aŋkul la abà, akul azlaməna madiŋal gəl à vok aw takay? ⁶ Iyay zlà, uwaga ma, akəsa vok ndzer kà mapuw gudzi à deda aŋkul anik à gəl, la huma aña azladza uwana tasəl Zəzagəla aw takay?

⁷ Baña tatak mapuwla vok gudzi à gəl la ahəŋ, la tataka aŋkul la abà, uwaga la uwana adukwakulla tsakana à gəl, uwana kadahaw à waŋ. Kà mana kabasaw vok tsakana aw ma? Kà mana kasakawwal ada à akul à gəl à tsəh pəra aw ma? Nuləm mabasiŋ. ⁸ La dziriga kà, akul la uwana kanəfaw mawisiga la mad à gəl, ŋgaha kadahaw uwaga kà la slaka azladedda aŋkul məna madiŋal gəl à vok aya bay. ⁹ Sələw la dziriga kà, azlaməna makəsafər tadàda à makoray Zəzagəla aw. Akul, kavavaraw gəl aŋkul aw. Azlaməna mabila, azlaməna manəf mazlazlay la azlaməna gəl gaw, ŋgaha la azlaməna matsatsəl vok kà atà kà atà zil zil kà, tadàda à makoray Zəzagəla tetuwa aw. ¹⁰ Ŋgaha la azlaməna gəl aña tatak aña azladza anik, la azlaməna makad

yewdi à azlatatak aṅa azladza anik à tsəh, la azlaməna guzu, la azlaməna matsak magodəhay à azladza anik à gəl, ṅgaha la azlaməna mazaḅ tatak aṅa azladza anik la ndzəḍa, azlatsəhay dza uwaga gesina kà, tadàḅək asik à abatà babay aw. ¹¹ Kiya uwaga à madz à ahəṅ aṅa azladza anik aṅkul uwarà. Ama lagonay kà, Masasəḍok Zəzagəla uwana mənəḍay kà adapal akul la tsakana gami la abà gesina sətaka adagay, akul maḅək akul à fəta à awtəy gə, kà ana Zəzagəla, kagaw dziriga la huma Zəzagəla kà sləm aṅa Sufəl Yesu Kristu uwana kasəlaw, ṅgaha kà Masasəḍok aṅa Zəzagəla gami.

Maday uwana akəs à Zəzagəla à gəl

¹² Iyay, azladza aṅuvaw la tataka aṅkul la abà tagod kà: ‘Tatak gesina kà, tetəvi la ahəṅ kà aṅami’, tagod. Iyay dziriga nəma, ama tatak gesina kà, akəsa à akul vok aw. Ama gi kà, asa à gi kà tatak anik afà à gi asik à gəl, kà gi aṅa magay mayà aṅha aw. ¹³ Madzugway aṅatà bay kà: ‘Zəzagəla adaha tatak may kà aṅa hud’, tagod. ‘ṅgaha hud babay kà aṅa maf tatak may à abà’, tagod aya. Iyay nəma. Ama Zəzagəla adəkalah à ahəṅ vərđi anik səla nna. Ama kà aṅa mabila kà, Zəzagəla adahà vok gami kà aṅa uwaga aw, ama Zəzagəla adahà kà anu aṅa madəhla sləray, uwana asa à Sufəl Yesu, kà uwana masla la uwana akor vok gami. ¹⁴ Zəzagəla awùlla Sufəl Yesu à uda la mamətsay, ṅgaha masla adəwulla anu à uda la mamətsay la ndzəḍa aṅha aya babay.

¹⁵ Kasəlaw kà vok aŋkul kà manəbay aŋa vok aŋa Yesu Kristu aw takay? Gəsləhàni manəbay aŋa vok aŋa Yesu, ŋgaha gi aŋa madla à slaka aŋa masla mazaɓ zil takay? Awaŋ! Akəs vok aw!

¹⁶ Kasəlaw kà baŋa dza agagamla à vok maləv la masla mazaɓ zil kà, tagay sləɓ vok tekula aw takay? Haɗay, tatsetsèr à wakità à abà kà:

'Atà səla nna, tagay sləɓ vok tekula.'✧

¹⁷ Ama dza uwana avà vok aŋha à Sufəl Yesu kà, masla la Yesu kà, atà tekula suwaŋ.

¹⁸ Tsa kità zlà kà, kahoyaw à mabila à ahà! Azlatsakana anik anik uwana azladza taɗa à ahəŋ gesina kà, abəz à huɗ gà aw. Ama dza uwana aɗàh mabila kà, awis vok aŋha ala la gəl aŋha. ¹⁹ Kasəlaw kà, vok aŋkul kà huɗ gày aŋa Masasəɗok Zəzagəla aw takay? Zəzagəla la uwana avà à akul Masasəɗok uwanay à uwana la ləv aŋkul la tsəh, kà uwana vok aŋkul kakoraw aw, Zəzagəla akoray. ²⁰ Zəzagəla apəl tatak kà mənŋa aŋa mavavarla akul. Kiya uwaga ɗahàw sləray la vok aŋkul kà mazləɓla Zəzagəla pəra.

7

Gay lakəl aŋa mazəɓ vok

¹ Lagwa kà, gəwula à gay aŋa manavay aŋkul uwana à tsəh, kanàvaw à gi, la wakità aŋkul la abà zlà. Gədzugw kà delga nəma, kà dza aŋa mazəɓ mis aw. ² Ama la madzugway gulo la abà aya kà, ŋuləm mazəɓ mis, gəl agoɗ à gi, kà dza aŋa matəɗ à mabila à abà. Delga kà uwabeyuwi

✧ 6:16 6.16 1Musa 2.24

aṅa magay la mis, ṅgaha kà azlamis bay tagay kità. ³ Kiya uwaga kà, zil avà à mis aṅha à tatak uwana mis aṅha ayahay, ṅgaha bay, mis avà à zil aṅha à tatak uwana zil aṅha ayahay. ⁴ Mis aslala vok aṅa mahən, uwana ala asa à vok aṅha aw: Say zil aṅha. Zil babay aslala vok aṅa mahən, uwana ala asa à vok aṅha bay aw, say mis aṅha la uwana ahənallaṅ ala. ⁵ Kiya uwaga zlà kà, kakwesawla kà vok mahən à ahəṅ kà akul à akul aw, say akul katsənaw vok à gay kà aṅa kaslà ṅuv lakəl aṅha, kà akul aṅa mazəḃ kaslà aṅa madəv kudfa à Zəzagəla. Ama la lig la ahəṅ hamàw gay à vok aya. Tsa baṅa kità aw kà, kadàslawwalla vok aṅa masləh vok à vok aṅkul aya aw, kà akul aṅa mav tetəvi à seteni kiga aw.

⁶ Ama: ‘Dahàwwàṅ uwanay’, gəgodf à akul, la magay zlà ma, aw. Ama agayṅa kadahawwanṅ kiya uwanay kà naka delga, gəgodf pəra. ⁷ Kəla kà, agay la madzugway gulo kà, naka delga azladza tadza à ahəṅ kokudfa mis bokuba gi, gəgodf. Ama kəla uwabeyuwi kà, aḃəzà mavày gərgər la slaka Zəzagəla. A azladza anik kà, avà à atà maslay aṅa madz à ahəṅ kiya uwanay kokudfa mis, à dza anik avàl maslay aṅa madz à ahəṅ la mis.

⁸ Lagonay kà, gədàgola à huma kà à slaka azlamagamza la azlamis kudfa kà mapəh à atà gay. Gəgodf à atà, kà delga, kà atà tadza à ahəṅ bokuba gi. ⁹ Ama baṅa kaslaw aw, kazəḃaw mis. Nuləm kà mis, kà akul aṅa mahəl gəl à ahəṅ la madzugway aṅkul la abà.

¹⁰ Lagwa kà, gəpəhay kà azlauwana la azlamis

adagay zlà, la tataka aña azlaməna madiñal gəl à vok la abà. Mapəhay uwanay kà gi gəpəh aw, ama Sufəl Zəzagəla la uwana apəh. Mis uwana adada à zil, aslala vok aña mavàh vok ala la zil aña aya aw, ama baña avàh vok ala kà, ada à zil anik aya aw, tsa baña kətà aw kà, tawul à vok à tsəh la zil aña. ¹¹ Nğaha bay zil aslala vok aña makudək mis aña aw.

¹² Lagonay kà, gəpəhay kà à azlaməna à uda adagay zlà, uwanay kà gay gulo, awkà gay aña Sufəl Yesu aw. Baña masla madiñal gəl à vok la mis, uwana adiñal gəl à vok aw, ama asal madz à ahəñ la zil aña, uwaga kà akudək aw. ¹³ Kà aña mis uwana masla madiñal gəl à vok babay kà, kiya uwanay bay. Baña zil aña adiñal gəl à vok aw, ama asal madz à ahəñ atà səla kà, ada aña aw. ¹⁴ Uwana gəpəh uwanay kà, kà uwana zil masla madiñal gəl à vok aw gə uwanay kà, Zəzagəla akəs kà, kà mis aña, uwana masla madiñal gəl à vok. Nğaha mis masla madiñal gəl à vok gə aw gə, uwanay aya kà Zəzagəla akəs kà, kà zil aña uwana adiñal gəl à vok aya suwan. Tsa aña kità aw kà, naka azlabəza aña atà kà, naka tagay kà bokuba azlabəza aña azladza uwana tasəl Zəzagəla aw gə zla, ama lagwa kà Zəzagəla adakəs atà. ¹⁵ Ama dza uwana adiñal gəl à vok aw, asal mavàhla la masla madiñal gəl à vok kà, vawwal tetəvi. Nğaha kà masla madiñal gəl à vok uwaga, adagay zilga, adagay misga kà, aga la mapəlla la abà adagay zlà. Zəzagəla azalà akul kà, kà madz à ahəñ la lapiya, la tələmma la abà. ¹⁶ Kak mis, kasəl ma kadətəf

zil anjak ay? Ngaha kak zil babay ma kadàtəf mis anjak tak ay? Kasəlaw aw!

Dzàw à ahəŋ bokuba uwana la abà Zəzagəla azalà akul

¹⁷ Uwaga kà kəsàw, say kəla uwabeyuwi anəf madz à ahəŋ anha uwana Zəzagəla avàl lela, ngaha manəf madz à ahəŋ anha uwana uwarà Zəzagəla azalàl la abà lela. Uwaga la uwana gəpəhay à azlamaham à ahəŋ məna gay Zəzagəla gesina. ¹⁸ Baŋa dza makədəv à uda gà, la mok uwana Zəzagəla azalàl kà: Kà mana mi, agof aw. Baŋa dza kokudə makədəv à uda gà, à mok uwana Zəzagəla azalal kà, ayàh makədəv à uda aya aw. ¹⁹ Magay makədəv à uda baŋaw magay kokudə makədəv à uda kà tatak tekula, makəs vok anjatà la ahəŋ aw. Tatak uwana akəs vok kà, say makəs mapəhay anja Zəzagəla pəra. ²⁰ Akəsa vok, kà kəla uwabeyuwi adza à ahəŋ la uwana la abà uwarà, la slaka uwana la abà Zəzagəla azalàl à mok uwana atsənà mazalal anja Zəzagəla. ²¹ Iyay, mayà uwana Zəzagəla azalàl kà, adzugw gəl aya aw, ama baŋa mas à afik la ahàl apəhla vok ala, kà anjak anja magay la makor gəl la abà babay kà bà delga, ²² mayà uwana Zəzagəla azalal adəgay à makor gəl la abà, kà uwana adagay tekula la Sufəl gami Yesu Kristu. Kiya uwaga babay, dza makor gəl gà, uwana Zəzagəla azalal, adəgay mayà anja Zəzagəla, kà uwana adagay anha aya. ²³ Zəzagəla avavarà akul la tatak mənğa, kità kà, kagaw azlamayà anja azladza aya aw. ²⁴ Azladedə gulo, kamkam, kəla uwabeyuwi adza

à ahəŋ la slaka Zəzagəla bokuba uwana adzà à ahəŋ à mok uwana Zəzagəla azaləl.

Gay lakəl aŋa azlamagamza, la azlamis kuɖa

²⁵ Lakəl aŋa azlamagamza kà, gi la gay aŋa Sufəl kà mapəh à atà aw. Ama madzugway gulo la uwana gəpəh à akul, delga katsəbaw sləm à gay gulo, kà uwana gi kà, gi masla mabəɖla gay aw, kikay kà maslay aŋa Sufəl Yesu Kristu.

²⁶ Madzugway gulo təbà: Baŋa dza adazəb mis didi aw kà, ŋuləm kà masla adza à ahəŋ à kà matərəbay aŋa lakana uwanay. ²⁷ Baŋa kak la mis bay kà, kakudək aw. Baŋa kak magamza gə babay kà, dzà à ahəŋ kiya uwaga, kayàh mis aw.

²⁸ Iyay zlà, amiyaka gəpəh kiya uwanay babay kà, baŋa kazəb mis kà tsakana, gəgodɖ magay aw. Ŋgaha baŋa dugu ada à zil babay kà, tsakana, gəgodɖ aw. Ama səlàw kà, azlauwana la azlamis la uwana tas ŋgərpa məŋga la gudəŋ uwanay la vok lakana, ŋgaha kà asa à gi kà akul aŋa mad à mas ŋgərpa uwaga à abà aw.

²⁹ Aganay uwana asa à gi mapəhay zlà, azladeda: Kaslà kà desl adagay. Dagay lakana kà, azladza uwana la azlamis kà, taga kà bokuba atà la azlamis aw kəla. ³⁰ Azlauwana tataway kà, taga bokuba atà la iyaw tugwi la adi aw, azlauwana la makəɖaslay la gay kà, tanərəz kà bokuba atà la makəɖaslay la gay aw, azlaməna masukw tatak babay kà, tanərəz kà bokuba takor tatak uwana tasukw aw. ³¹ Azladza uwana takəs vok la azlatatak aŋa gudəŋ à vok uwanay kà, tanərəz kà bokuba takəs vok la uwaga aya

aw, kà uwana gudəŋ à vok uwana kanəŋawwan lagonay kà, adàzila, tuwiz.

³² Lagwa kà, asa à gi kà kahəlaw gəl à ahəŋ kà madzugw gəl. Dza uwana azəb mis aw kà, afa gəl kà à sləray aŋa Sufəl Zəzagəla pəra, ayàh mahəfay kà Sufəl à adi pəra. ³³ Ama dza uwana adazəb mis kà, afa gəl kà azlatatak aŋa gudəŋ à vok uwanay, asal mahəfay kà à mis aŋha à adi suwan. ³⁴ Kiya uwaga ləv aŋha adavahla səla, kiya uwaga la mis babay. Mis uwana zil aŋha la ahəŋ aw baŋaw dahalay uwana la zil aw kà, tafa gəl kà à sləray aŋa Sufəl Zəzagəla. Tavà vok aŋatà la ləv aŋatà gesina à Zəzagəla, ama mis uwana la zil kà, adzugway kà lakəl aŋa azlatatak aŋa gudəŋ à vok uwanay, kà uwana asal madf à ahəŋ kà uwana akəs à zil aŋha à gəl.

³⁵ Uwana gəpəh uwanay kà, kà uwana asa à gi mazlak akul. Gəyàh madədf akul gay à ahəŋ aw, asa à gi kadahawwan kà uwana delga, dfaħaw sləray aŋa Sufəl Zəzagəla la ləv tekula.

³⁶ Lagwa, gədzugw lakəl aŋa azlamawuɖa uwana asa à atà mazəb vok aya aw. Baŋa dahalay atà la mawuɖa aŋha, tadzugw kà atà aŋa mazəb vok aya aw, la lig la ahəŋ kohana adzugway aya kà à mawuɖa aŋha, ŋgaha kà madzugway aŋha gesina kà la masla la tsəh kà, akəsa vok kà mazəbay kà, tazəb vok bokuba uwana asa à atà, uwaga kà tsakana aw. ³⁷ Ama baŋa agəɖaŋ à afik kà, uwala tatak la ahəŋ atərəbəŋ aw, ŋgaha mabila azəŋ aw kà, kità kà, agədf à madzugway aŋha à afik, azəb mawuɖa aŋha uwaga aw. ³⁸ Dza uwana azəb mawuɖa

aŋha kà, adaha delga, ama dza uwana azəb aw adaha sləray kà dzəba aŋha səla aw, aduwa vok kaykay aya.

³⁹ Mis uwana la zil, masla aga la sasala la abà, kà uwana zil aŋha la ahəŋ la sifa. Ama baŋa zil adamətsay, mis adapəlla. Baŋa asal, ada à zil anik, ama say aday kà à mtəga masla madiŋal gəl à vok. ⁴⁰ Ama baŋa adza à ahəŋ kokudə aŋa mad zil kà, marabay aŋha kà ada à zagəla. Kəla kà, uwaga kà madzugway gulo zlà. Ama gi babay kà, gi la Masasəfok aŋa Zəzagəla à uwana apəhgəla.

8

Sləb uwana takəd à azlamazlazlay à ahəŋ

¹ Lagwa mənərež gay lakəl aŋa azlasləb uwana takəd à azlamazlazlay à ahəŋ zlà:

Akul kà kagodəw kà: ‘Anu gesina la haŋkəli’, kagodəw. La dziriga kà, haŋkəli tsəhay gə uwaga kà adala dza kà à zlapay à abà pəra. Masal la uwana adzərədəh azlaməna madiŋal gəl à vok ala. ² Dza uwana: ‘Gəsəl tatak’, agod kà, asəl tatak bokuba uwana anaka, asəl dadəŋ aw. ³ Ama dza uwana awoya Zəzagəla kà, Zəzagəla asəl masla.

⁴ Aganay gay gə uwana: Dza aslala vok aŋa mapad sləb, uwana takəd à azlamazlazlay takay? Məsəl kà, mazlazlay kà tatak deyday la gudəŋ uwanay la vok. Məsəl kà say Zəzagəla kokudə gəl aŋha tekula pəra. ⁵ Hadəy gə, azlatatak la ahəŋ la zagəla ŋgaha la vədəh à uwana azladza tasləkaw tatak uwatə bokuba zəzagəla. Azlatatədiya la ahəŋ, kiya uwaga

à uwana azladza taslökaway, tapakahatàla kà azlaməŋga aŋatà bokuba zəzagəla. ⁶ Ama kà aŋami kà, Zəzagəla kà tekula ahəl pəra. Masla la uwana Baba gami. Tatak uwana la gudəŋ la vok gesina kà, aguwà à uda kà la ahəl aŋha. Adfahà anu babay, kà anu aŋa magay azlaaŋha. Sufəl gami babay kà tekula pəra, uwaga kà Yesu Kristu. Tatak gesina atsà à uda la ahəl aŋha, məbəzà sifa babay kà la ahəl aŋha.

⁷ Ama azladza gesina tasəl dziriga uwaga aw. Kà uwana azladza aŋuvaw tadəhla slilih kà la manəf azlamazlazlay, ŋgaha lakana aya baŋa tapad azlasləb uwana takədɸ à mazlazlay à aya kà, ndzer tanəraz bokuba sləb aŋa mazlazlay la dziriga, kà uwana tabəz ndzəɸa la tetəvi aŋa Zəzagəla la tsəh dadəŋ aw, guba aza à atà, kà madfah àläh à vok aŋatà à vok la mapad sləb uwaga. ⁸ Ama la dziriga kà, tatak may adfaha à anu àläh la slaka Zəzagəla aw. Baŋa məzuw azlatatak anik aw babay kà məgogolay aw, baŋa məzuw babay kà, agagis anu aw.

⁹ Ama kamkam ɸahàw haŋkəli, kà uwana akul la makor gəl la abà, kà mazuw tatak gesina. Ama zlahaw kà, uwaga adala dza, uwana azlaguɸguɸ la tetəvi aŋa Zəzagəla la tsəh, à tsakana à abà, kà delga aw. ¹⁰ Haday kà, baŋa dza anik guɸguɸga anəŋa ka, à kak uwana kasəl tatak, kadadza madzay la gày mazlazlay la aku kà mazuw tatak kà, masla bay kà, adəzuway suwaŋ, kà uwana kadàkadalla gəl à vok. ¹¹ Ŋgaha deda aŋak maruw vok à ahəŋ gà, uwana Kristu aməts kà aŋha kà, masla azila la tsəh aŋa masəl tatak

aṅak uwana kaɗfahàṅ. ¹² Maɗàh tsakana tsəhay uwaga kà, delga aw. Katsalla matekwid à deda aṅak, azəṅ la madzugway aṅha la abà, ṅgaha bay kà, kaɗàh tsakana kà à Kristu à vok la gəl aṅha babay. ¹³ Tsa baṅa tatak may la uwana atsala matekwid à deda gulo kà, kà mad à tsakana à abà kà, ṅuləm gəpad azlasləb uwana takàɗ à azlamazlazlay à ahəṅ ðikidiki aw, ṅgaha kà, gi aṅa matsala matekwid à deda gulo aw.

9

Gay lakəl aṅa azlaməna masləlay

¹ Gi kà, gi la makor gəl la abà aw takay? Gi masləlay aw ay? ṅgaha gənəṅà Yesu Kristu la yewdi gulo. Akul uwanay kà akul mayyi à tsəh aṅa sləray gulo uwana gəɗfahàṅ aw takay? ² Iyay, amiyaka azladza anik takəs gi bokuba gi masləlay aw kà, akul kà, kasəlaw gi, kà gi masla masləl gi gà, kà maham gay à vok aṅkul, uwana la Yesu la abà, apəhla kà, gi masləlay ndzer, kà uwana gi la gəl gulo la uwana gəpəh à akul gay marabəṅ.

³ Aganay tatak uwana gəpəh à azladza uwana taslaha gi məl à gəl. ⁴ Azlayla gi kà gəbəzal tatak may la tatak masay kà aṅa sləray gulo aw takay? ⁵ Azlayla gi kà, gi aṅa mazəb mis masla maɗiṅal gəl à vok gà, kà mauguzahay anu səla, bokuba uwana azlaməna masləlay anik, la azladedà aṅa Sufəl gami, la Piyer aw takay? ⁶ Awma anu la Barnabas la uwana məɗàh sləray kà anu aṅa madzadzar gəl gami pəra takay? ⁷ Slodzi uwana la guvəl la gay, ma masla adzadzar gəl aṅha

takay? Awma dza ma uwala à uwana azuw mayyay tatak aña guf aña, uwana aslaka aw la? Masla manəŋla azlaləmana, ma asa awà añaatà aw takay?

⁸ Ama kadzugwaw kà mapəhay gulo kà, apəhay aña azladza pəra, kagodaw aw, awaŋ, wakità seriya aña Zəzagəla babay kà apəh kiya uwaga. ⁹ Aganay uwana tatsətsər à wakità Zəzagəla à abà:

'Kawadaw gay à kokur uwana à ahəŋ, azlaɓ hi aw.'[☆]

Zəzagəla ma adzugw ma lakəl aña kokur, kagodaw takay? ¹⁰ Kasəlaw kà, la dziriga kà, apəh kà anu aw takay? La dziriga kà, gay uwatà kà tatsətsər kà aŋami, akəsà vok kà masla mapəs guf, la masla mazlaɓ tatak kà, say tadəv sləray añaatà à gay lela kəla, la maf madzugway añaatà à ahəŋ kà humà gà añaatà la tatak uwaga la abà suwaŋ. ¹¹ Anu mətsəd makəs vok aña tatak gudəŋ à vok la slaka aŋkul, ma uwaga ma tatak delga aw takay? ¹² Baña azlawla azlaanik kà mabəz tatak la ahəl aŋkul ma, anu la uwana azlawla anu kaykay aw takay?

Adagay kiya uwaga babay kà anu, kà mədahaŋ kiya uwaga aw, bà kəla ŋgərpa uwana abəz anu kà, anu kà məbasiŋ kà anu aña madàh tatak uwana adəd gay à azladza anik à ahəŋ aña matsən gay marabəŋ lakəl aña Yesu Kristu aw. ¹³ Sèlawa la dziriga kà, azlawana tadàh sləray la məŋ gày Zəzagəla la aku kà, tabəz tatak may añaatà la aku la abatà. Ŋgaha azlaməna makad

☆ 9:9 9.9 5Musa 25.4

tatak la aku la abatà, tabəz humà gə aŋatà la azlatatak uwatà la abà takadafay.✧ ¹⁴ Kiya uwaga babay, Sufəl Yesu apəh kà azlauwana taz gay marabəŋ kà, tadzadzar vok la uwatà suwaŋ, agòd.

¹⁵ Amiyaka adagay kiya uwanay babay kà, gəda à ahəŋ kiya uwaga aw. Gətsetser kà masləl gi tatak à awaŋ, gəgodf à akul, aw. Kà uwana ŋuləm gəməts kà manav tatak à kà dza aŋa makəl gi marabay gulo ala aw. ¹⁶ Gi, gəts zlapay kà maz gay marabəŋ aw, kà uwana kà leri gə kà aŋulo kà madfehəŋ. Baŋa gi gəz gay marabəŋ uwaga aw kà, matərəbəy agay la gi. ¹⁷ Agayŋa gi la uwana gəkəsàni sləray uwaga la ahəl gulo kà madfehəŋ kà, naka gəkud məbəz masik. Iyay, tsa uwaga kà, sləray gulo kà madfehəŋ kà, say gəduw yewdi kà à abà sləray, uwana Zəzagəla afà à gi à ahəl la gəl aŋha. ¹⁸ Gi ma mana à masik gulo zlà ma? Aganay masik gulo: Gəz gay marabəŋ kà deyday, kà uwana gənava aŋuf aŋa sləray sayda uwana gədfəhəŋ aw, ama naka azlayla gi nəma.

Asa à gi masəlla azladza à slaka Zəzagəla pəra

¹⁹ Gi la makor gəl la abà, gi mayà aŋa dza aw. Ama gi la gəl gulo la uwana gəpakà gəl gulo ala kà mayà, ŋgaha gi aŋa masəlla azladza à slaka Kristu. ²⁰ Mok uwana gədfəh sləray la tataka azla Yahudiya la abà kà, gədzà à ahəŋ bokuba gi zil Yahudiya, kà gi aŋa məbəz atà, ama gi la gəl gulo kà, gi la tsəh aŋa məpəhay aŋa Musa aw. Gədzà

✧ **9:13** 9.13 5Musa 18.1

à ahəŋ la tataka azlauwana tanəfa mapəhay, gədzà à ahəŋ bokuba aŋatà, kà gi aŋa maβəz atà. ²¹ Kiya uwaga, mok uwana gədzà à ahəŋ la tataka azlauwana la abà tasəl mapəhay aŋa Musa aw, gədzà à ahəŋ bokuba aŋatà, la kokudà maf gəl à mapəhay uwaga, kà gi aŋa maβəz atà la kokudà maf gəl à mapəhay uwaga, kà gi aŋa maβəz atà suwaŋ. Ama uwaga kà, asal magodəy kà, gəkəs mapəhay aw, magay aw, awaŋ, gənəfa mapəhay aŋa Yesu Kristu. ²² La huma aŋa azlauwana atà maruw vok à ahəŋ gə kà, gi babay gəga aŋa maβəz atà. Uwaga gədehəŋ gesina kà, kà gi aŋa maβəz atà, ŋgaha atà aŋa maβəlay, amiyaka tekula aŋatà aŋa mazilaw. ²³ Uwana gəđàh uwaga gesina kà, kà gay marabəŋ aŋa mad à huma à gay lela, kà gi aŋa maβəz masik la azladza anik bay.

²⁴ Kasəlaw la dziriga kà, azladza uwana tagor mahoyay, gesina aŋatà tahoyay, ama dza tekula la uwana adàbəza masik uwana tapəh pəra. Kità kà, gòràw mahoyay, kà akul aŋa maβəz masik. ²⁵ Dza uwana asal magor mahoyay kà, say atsətsəh vok ala dagay uwarà dadàŋ, kà masla aŋa maβəz masik. Ama masik uwatà adàbəzal la gudəŋ uwanay la vok, kà adàwisla. Kəla kà, kà aŋami kà, mətətsəh vok ala kà, kà anu aŋa maβəz masik uwana adəv à gay aw, akəl adàsàl à adi ala aw. ²⁶ Kà uwaga à uwana gəđəgay la matsək yewdi, kà say à huma à gay kabaw. Kà uwaga à uwana gəđəgay kà bokuba masla madəđ kotəpa uwana azlaβ afad deyday aw. ²⁷ Gəsal vok gulo lela, kà gi aŋa makor

vok gulo, kà la marabəŋ makəɖ gəl à ahəŋ, kà Zəzagəla aŋa magolla gi la lig à gi uwana gəzà gay marabəŋ aŋha à azladza anik aw.

10

Kahamaw gay à vok la azlamazlazlay aw

¹ Azladedà, delga awul à akul à gəl, lakəl aŋa azlababa gami madzidziga uwana tauguzàh la Musa. Zəzagəla adək à atà magudu gudu à gəl gesina, atsakà atà à ama, ŋgaha gesina aŋatà taguwà à uda la mukwà mativga la abà aya.✧

² Atà gesina aŋatà kà tabəzà batem la magudu gudu, ŋgaha la mukwà mativga la abà. Atà gesina aŋa tahamà gay à vok la Musa. ³ Atà gesina aŋatà tazùw tatak may uwana asà à ahəŋ la slaka Zəzagəla babay. ⁴ Tasàh iyaw uwana akalàh à uda la dzəgla la abà, uwana Zəzagəla avàh à atà dzəgla, uwana Zəzagəla avà à atà kà, kà Yesu Kristu uwana aguwà à huma.✧ ⁵ Bà la uwaga gesina kà, Zəzagəla akweskà madəhəŋ aŋatà, kà uwaga à uwana gesina aŋatà tamàts à kəsaf à abà.

⁶ Azlatatak uwaga kà tazlaka anu lakana, kà anu aŋa madàh à adi la mabila mawisiga uwana atà tadfahàhàŋ aw. ⁷ Kasləkawaw azlamazlazlay bokuba uwana azlaanik aŋatà tadfahàhàŋ aw. Wakità agof lakəl kà:

'Azladza tadzà madzay, tazùw tatak, tasàhàh tatak, ŋgaha tasà à afik kà mahab dəs azlamazlazlay.✧

✧ **10:1** 10.1 2Musa 13.21-22 ✧ **10:4** 10.4 2Musa 16.35; 17.6

✧ **10:7** 10.7 2Musa 32.6

Kamkam, kà ankul kà kaslökawaw azlamazlazlay aw. ⁸ Kadahaw mabila bokuba azlaanik anjata, uwana dza dëbow dzik sëla gël anha makër tamatsà à gay la mavakay tekula la tsëh aw. ⁹ Digiya katapaw Sufël Zëzagëla, bokuba azladza anik anjata aw. Atà tamatsàh à matsàh atà anja bebi à abà. ¹⁰ Kanonuzaw lakël anja Zëzagëla bokuba azlaanik anjata uwana tadhàhàn aw. Malika anja mamötsay azahà atà ala. Akul kà kadahawwanj kiya anjata aw.

¹¹ Uwana Zëzagëla adahàhà azlatatak uwaga gesina kà, kà azladza anja masël azlatatak la uwaga la abà, ngaha kà atà anja madàh hanjëli. Tatsetsër uwaga à wakità à abà, kà atà anja matapanula azlatatak à anu azladza anja zamana uwanay azladëv à gay. ¹² Kà uwaga, dzàw à ahëj dzawwa. Dza uwana adatsizilla à ahëj kà, say adaha hanjëli kà masla anja matëf à ahëj aw. ¹³ Azlamatërëbay uwana tabëza akul kà, tabëza azladza gesina babay. Ama Zëzagëla, uwana agëdij dziriga anha à afik kà, asak à matërëbay kà matërëb akul la azlatatak uwana la abà, aduwa ndzëfa ankul aw. Masla adàv à akul ndzëfa kà mabasiñ, ngaha kà mas à uda la abà aya babay.

¹⁴ Kà uwaga azladedà gay lëv gulo, hëyàw à azlamazlazlay à ahàl. ¹⁵ Gëpëhay kà akul azladza matsën slëm gà, nërèzàw lakël ankul à uwana gëpëhay tsi, kà uwana dziri à uwana gëpëhay. ¹⁶ Akul dzügwàw lakël anja tatak may anja Sufël uwana mëzuwahay tsi. La mok uwana mëzuway la slaka gà, à tatak may anja Sufël,

kasəlaw kà anu la Kristu mədahama gay à vok la aniz tekula la abà aw takay? Mok uwana mətsək kaf ala kà mazuway kà, kasəlaw kà mədaham gay à vok la sləb vok anə Yesu Kristu la abà tekula aw takay? ¹⁷ Kaf kà tekula pəra à uwana anu gesina məzuway, kaf tekula gə uwaga kà apəhla ala kà mədagay tekula, kà uwana məzùw kà kaf tekula uwatà.

¹⁸ Dzùgwàw lakəl anə tsəhay Isərayel dadən tsi. Takədəh azlatatak à Zəzagəla kà, azlauwana tapədəh sləb uwaga kà, atə tekula la Zəzagəla.✧

¹⁹ Mana à uwana mafafad bəga la gay uwaga la abà ma? Sləb uwana dza akəd à azlamazlazlay la azlamazlazlay ma, tatak dziriga takay? Awan!

²⁰ Ama uwana azlaməna makəd tatak uwana tasəl Zəzagəla aw kà, takaday kà à azlamazlazlay, awkà à Zəzagəla aw ama à seteni. Ngaha asa à gi kà kahamaw gay à vok la azlamasəsədok mawisiga aw. ²¹ Kà uwana kaslawwalla vok anə matsəp gay à masakwa anə Sufəl la abà la anə azlamasəsədok mawisiga la abà aw. Ngaha babay kaslawwalla vok anə madz madzay la tatak may anə Sufəl Yesu la adi, ngaha kadzaw madzay la anə masəsədok mawisiga la adi aya babay aw. ²² Awma asa à anu madla ləv à Sufəl Zəzagəla à huf takay? Ngaha ma məfuwa masla la ndzədə takay?

Madz à ahəŋ kà matsala matekwid à azladza anik aw

²³ Hadfay, azladza anik la tataka ankul la abà tagod kà: 'Anu la makor gəl la abà kà tatak

✧ **10:18** 10.18 3Musa 7.6

gesina'. Iyay noma, ama tatak gesina ka azlaka anu aw pera. Tagod aya ka: 'Anu la tetovi ka madah tatak gesina', ama la azlatatak anik ka, madazigonla magay la tetovi aya Zezagela la tseh aw. ²⁴ Kayahaw ka azlatatak uwana akosa akul a vok pera aw, ama yahaw ka uwana akosa vok a azladza anik babay suwan.

²⁵ Kela tatak uwana tadaw ala la kasukwa, bokuba azlasleb kapadaw, kokuda mabek gel a ahon sela la lev ankul la tseh. ²⁶ Haday, bokuba uwana tatseser a wakita Zezagela a aba ka, agod ka:

'Sufel Zezagela la uwana akor gudon a vok gesina, la azlatatak uwana la aba gesina.'[☆]

²⁷ Banja masla madinal gel a vok aw anik, azala akul ka mazuw tatak may la mtoga anha ka, zuwaw kela tatak gesina uwana adafa a akul a huma a gay, la kokuda manaval lakel aya mabek gel a ahon sela ankul. ²⁸ Ama kela ka, banja dza agod a akul ka, slab uwanay ka slab mazlazlay ka, uwaga ka kazuwaw zla ma aw, ka uwana adapohakulla, ngaha ka kak aya makadla gel a vok, la lev anha la tseh aw. ²⁹ Madzugway aya lev ankul gegod aw, ama aya lev anha. La dziri madzugway aya lev aya dza aslala vok aya madah seriya a madzugway aya makor gel aya lev gulo a gel aw. ³⁰ Banja kikay gedagod a Zezagela ka tatak may gulo aya ma, kakay dza apesew gi lakel aya tatak may uwana kikay gegod a Zezagela gulo aya ma?

[☆] **10:26** 10.26 Mahabay 24.1

³¹ Uwana gəpəh kà kiya uwanay, kadàzuw mana babey mi, kadàsa mana babey mi, kadàdfah mana babey mi, dfahəŋ kà la tetəvi uwana sləm aŋa Sufəl Zəzagəla aŋa maday à huma à gay la mazingənay pəra. ³² Kada-hawwanə kà la makad gəl à azladza à vok aw: Adagay zil Yahudiya, adagay zil Yahudiya aw, adagay azlaməna madıŋal gəl à Zəzagəla à vok. ³³ Dahəwwəŋ bokuba uwana gi gədfahəŋ. Gi gədawad vok à uda, kà gi aŋa mawoy uwabe-yuwi gesina, gəyàh uwana akəs gi vok aw, say uwana akəs vok à azladza, kà atə aŋa mabəlay.

11

¹ Dzàw à ahəŋ bokuba uwana gədza à ahəŋ, nəfəw gi, bokuba uwana gənəfa Kristu.

Azlazil la azlamis la huma aŋa Zəzagəla

² Azladedə gəzləb akul, kà uwana kadzugwaw lakəl gulo koksikoksi, ŋgaha kà uwana kanəfaw azlatatak uwana gətəpakulla gesina aya. ³ Ama bə la kitə kà, asa à gi kà kasəlaw uwanay: Sələw kà Kristu kà Sufəl gə aŋa azladza gesina. Zil kà mənğa aŋa mis, ŋgaha Zəzagəla kà masla kà mənğa aŋa Kristu. ⁴ Kà uwaga baŋa zil adəv kudfa, baŋaw apəha gay Zəzagəla la gəy la aku la maf tatak à gəl gə kà, kiya uwaga kà masla apəsew mənğa aŋha. ⁵ Kiya uwaga babay baŋa mis adəv kudfa baŋaw apəh gay Zəzagəla la gəy la aku la gəl deyday gə kà, apəsew zil aŋha. Apakay kà bokuba masla mafəts gəl à ahəŋ gə. ⁶ Tsa baŋa mis awad nalbət à gəl aw, ma kà mana afəts gəl à ahəŋ pəra aw zlə ma? Ama

masl anjdz anja mis la mafəts gəl à ahəŋ kà uwaga kà ziruwı, say awadfa nalbət à gəl. ⁷ Ama zil kà afa tatak à gəl aw, kà uwana masla maftsa vok anja Zəzagəla. Masla apəhla mazləbay anja Zəzagəla ala, ama mis kà apəhla kà mazləbay anja zil anja ala suwan. ⁸ Haday kà, zil kà asà à uda kà la mis la abà aw, ama mis la uwana, asà à uda la zil la abà. ⁹ Zəzagəla anəl zil kà anja mis aw, ama anəl mis kà anja zil.✧ ¹⁰ Kà uwaga à uwana mis ahad gəl à ahəŋ la nalbət, kà masləkaway zil anja, ŋgaha kà azlamalika babay. ¹¹ Amiyaka adagay kiya uwanay kà, kà anami uwana mədagay tekula la Sufəl Yesu Kristu kà, məsəl kà mis aslala vok anja madz à ahəŋ la aslasl gəl anja aw, ŋgaha zil babay aslala vok anja madz à ahəŋ la aslasl gəl anja babay aw. Say atà səla nna. ¹² Iyay, bokuba uwana mis kà asa à uda kà la zil la abà kà, kiya uwaga kà, lakana mis la uwana ayyi zil lagwa, ama atà səla nna kà tasà à wan la slaka Zəzagəla, masla maŋal tatak gesina.

¹³ Nərəzàw la gəl ankul dadəŋ: Baŋa mis adəv kuɖa à Zəzagəla la gəy madəv kuɖa la aku la gəl deyday, ma akəsa vok takay? Wùllàw à gi ala tsi! ¹⁴ Bə la madz à ahəŋ la abà kà, ziruwı kà anja zil kà masak anjdz zinziŋga lakəl. ¹⁵ Ama baŋa mis azigənəŋ anjdz anja à gəl kà, uwaga kà tatak dzəba anja səla aw gə. Abəz anjdz anja zinziŋga bokuba tatak mahadfa gəl à ahəŋ. ¹⁶ Ama baŋa dza asal mats gay lakəl anja uwaga kà, sələw kà, anu kà məsəl madz à ahəŋ anik aw,

✧ **11:9** 11.9 1Musa 2.18-23

amiyaka azlaməna gay Zəzagəla babay kà tasəl tetəvi anik babay aw.

Mazuw tatak may aña Sufəl Yesu Kristu

(Mata 26.26-29; Mark 14.22-25; Luka 22.15-20)

¹⁷ Tatak uwana asa à gi aña mapəh à akul kà mazləb anu kagodaw aw. Kà uwana mok uwana kahamaw gay à vok kà aña masləkaw Zəzagəla kà, tatak delga kadahawwan aw, ama kadahahawwan kà mawisiga, delga aw, gəgod à akul. ¹⁸ Terəña kà, mok uwana kahamahaw gay à vok, kà aña masləkaw Zəzagəla kà, katsakahawla gərgər, tagod à gi, uwaga ma dziri ay? Wùllaw à gi ala tsi! ¹⁹ (Duli matsakla agay la tataka aňkul la abà, ngaha kà masəlla ala azlauwana azlaaňa Sufəl Yesu dziriga) ²⁰ Uwana kamahaw gay à vok kà kazawaw tatak may aña Sufəl aw. ²¹ Kà uwana kəla uwabeyuwi aňkul kà av vok aña mazuw aňha, ngaha azlaanik tagod à ahəŋ la may gə, ngaha azlaanik aya kà guzu adakad atà zlà, gəgod. ²² Tsa baňa kiya uwaga kadahawwan, ma kà mana kazawaw tatak may la mtəga aňkul aw ma? Asa à akul aña mapəsew maham à ahəŋ məna madiŋal gəl à vok kəla ay? Awma kà, makəl ziruwi à azlauwana à gəl tatak may aňatà la ahəŋ aw, kagodaw kəla ay? Mana gəpəh à akul lagwa zlà ma kagodaw ma? Gəzləb akul, kagodaw ay? Awan, gəzləb akul aw!

²³ Aganay matapla uwana Sufəl Yesu atəpgəla, à uwana gətəpakulla: Sufəl Yesu la vəd uwana tatəl kaf à gəl kà mavà y à ahəl aña azladza kà, azəb kaf à ahəl, ²⁴ kikay agod à Zəzagəla kà kaf, atsəkà kaf uwaga ala, agod:

'Uwanay kà vok gulo uwana aga matsəkəŋ ala gà kà aŋkul, zùwàw uwaga kà gi aŋa mawul à akul à gəl.'

²⁵ La lig aŋa mazuw tatak may aŋatà la ahəŋ, azəb kətsaw à ahəl, agòd:

'Tatak masay uwana la kətsaw uwanay la abà kà, makəs vok slawda mawga la aŋiz gulo, uwana adàsokw à vədah. Kəla kaslà uwana kadàsahaw uwanay kà, kà gi aŋa mawul à akul à gəl.' ✧

²⁶ Mapəhay aŋa Sufəl Yesu uwanay apəhla ala kà, la kəla kaslà uwana kazuwaw kaf uwanay, la mas tatak masal à gəl uwanay kà, kapəhaw kà gay mamətsay aŋha à azladza, tsərəh à kaslà uwana Sufəl adàwul à waŋ.

²⁷ Kà uwaga kà baŋa dza azuw kaf, ŋgaha as tatak masay à uda la kətsaw aŋa Sufəl Yesu la abà la kokudə, mavəh gəl aŋha ala kà, adəh tsakana à vok aŋa Sufəl Yesu à gəl, ŋgaha à aŋiz aŋha à gəl aya. ²⁸ Kità kà, kəla uwabeyuwi agur gəl aŋha dadəŋ, ŋgaha masla aŋa mazuw kaf, la mas tatak à uda la kətsaw uwaga la abà.

²⁹ Kà uwana baŋa avaha uwaga ala la tatak may deyday gə aw kà, abiy seriya à gəl aŋha la mazuway aŋha la masay aŋha. ³⁰ Kà uwaga à uwana aŋuvaw la tataka aŋkul la abà takələh à vədah, tapakəh magudu, tapakəh azlaməna dufvats ŋgaha aŋuvaw taməts à gay aya bay.

³¹ Baŋa anu məgur gəl gami dadəŋ kà, Zəzagəla adədfaha à anu seriya à gəl aw. ³² Baŋa Sufəl Yesu asləha à anu à vok kà, kà matsatsəh anu

✧ **11:25** 11.25 2Musa 24.6-8; Yeremiya 31.31-34

ala la tatak uwana la abà kà, seriya aña madàkəs anu kiya aña azladza anik aw.

³³ Kà uwaga azladede gulo, baña kadàhamaw gay à vok, kà mazuw tatak may aña Sufəl kà, kudàhàw vok kà akul aña magay la ahəŋ gesina.

³⁴ Baña dza la may gà kà, say azuw kaf à huɸ la mtəga aña, kà maham gay à vok aŋkul aña mabiyakulla seriya aña Zəzagəla à gəl aw.

Kà aña azlagay anik, say baña gədàda à awtày la uwana, gədàdəvəŋ à gay zlà.

12

Mavày uwana Masasədok Zəzagəla avày kà madàhla sləray

(Rom 12.1-11; 1 Korintiya 14.1-25)

¹ Lagwa adagay kà məpəh gay aña mavày aña Masasədok Zəzagəla. Azladede gulo, asa à gi kà kasəlaw uwaga lela. ² Azladede, mok uwana kaləgaw aña madiŋ gəl à Yesu à vok kà, kanəfàhàw azlamazlazlay badaga uwana takòràh akul. ³ Kà uwaga à uwana, asa à gi kà kasəlaw uwaga: Baña Masasədok Zəzagəla adakəs dza kà, dza uwatà kà aslala vok aña magoday kà: 'Yesu kà matsafla gà!', agoday aw. Kiya uwaga babay: 'Yesu kà Sufəl Zəzagəla', dza agoday aw, say baña Masasədok Zəzagəla la masla la abà.

⁴ Aga la ahəŋ azlamavày anik anik gərgagər aŋuvaw, ama Masasədok tekula la uwana avà à atà tetəvi gesina aŋatà. ⁵ Aga la ahəŋ azlatatak anik anik aŋuvaw, ama Sufəl Yesu tekula, la uwana avà à atà tetəvi aña mavày uwaga gesina.

⁶ Aga la ahəŋ azlamaslay aŋa maɖàh sləray anik anik gərgagər aŋuvaw, ama Zəzagəla kokudfa gəl aŋha la uwana avà y à kəla uwabeyuwi maslay aŋa sləray uwaga. ⁷ Masasəɖok apəhla ala kà, aga la kəla uwabeyuwi aŋkul la abà, kà akul aŋa mazlakla maham à ahəŋ məna gay Zəzagəla la mavà y uwaga. ⁸ Masasəɖok avà y à dza matsihila, ŋgaha bà la Masasəɖok uwaga avà à dza anik aya maslay aŋa mapəhla madzugway aŋa Zəzagəla ala. ⁹ Kà aŋa dza anik aya kà, Masasəɖok avà l ndzəɖa kà maɖiŋ gəl à Yesu à vok la dziriga. Ŋgaha avà à dza anik maslay kà mawar azlaməna ɖuvats ala. ¹⁰ Uwaga avà à azladza anik maslay kà maɖàh azlanadzipo, à azladza anik aya avà à atà maslay kà mapəh paŋaw aŋa Zəzagəla, uwana apəh à atà, à azladza anik aya avà à atà maslay kà mabadma la azlagay anik anik, à azladza anik aya avà à atà maslay kà mapalla godega aŋa azlagay uwaga ala. ¹¹ Uwaga kà bà Masasəɖok tekula gà, gà la uwaga à uwana aɖàh uwaga gesina, masla avà maslay à dza gərgagər bokuba uwana asal.

Maham à ahəŋ məna maɖiŋal gəl à vok kà,

aga kà bokuba vok aŋa dza

¹² Məsəl kà vok aŋa dza kà tekula, ama azlamanabay la ahəŋ gərgagər. Amiyaka azlamanabay la vok aŋa dza kà gərgagər ama vok kà tekula pəra. La Kristu bay kà kità. ¹³ Ŋgaha anu azla Yahudiya la azlauwana azla Yahudiya aw, azlamayà baŋaw azladza uwana takor gəl, tafahà anu batem kà, kà anu aŋa magay vok

tekula la Masasədok tsikaslaga uwaga la abà, ñgaha Zəzagəla avà à anu maslay la Masasəfok tekula uwaga la abà.

¹⁴ Vok kà, aga la manabay tekula pəra aw, ama manabay dəŋ. ¹⁵ Iyay zlahaw kà, asik agodəy kà: ‘Gi manabay aŋa vok à gi aw, kà uwana gi ahəl aw’, agodəy, ‘Kità kà, gi aŋa vok aw’, bə la uwaga gesina kà masla manabay aŋa vok, ndzer. ¹⁶ Zlahaw sləm agodəy kà: ‘Gi kà gi yewdi aw, gay gə la uwaga gəga manabay aŋa vok aw’, agodəy, bə la dziriga uwaga adəf gay à sləm à ahəŋ aŋa magay manabay aŋa vok aw. ¹⁷ Agayŋa vok gesina kà naka agay kà yewdi pəra, ma naka kakay atsən sləm ma? Ñgaha agay, agay kà sləm, pəra ma naka kakay azin tatak ma? ¹⁸ Ndzer, Zəzagəla abək azlamanabay à vok à vok bokuba uwana asal. ¹⁹ Agayŋa vok gesina agay kà manabay tekula pəra kà, uwaga kà naka agay vok aw. ²⁰ Ama lagwa kà, azlamanabay aŋuvaw la vok tekula la vok.

²¹ Kiya uwaga kà, yewdi aslala vok aŋa magod à ahəl kà: ‘Gəyah ka aw!’, agodal aw. Ñgaha takasagəl babay aslala vok aŋa mapəhay uwaga à asik babay aw. ²² Tetuwa kiya uwaga aw! Azlamanabay aŋa vok, uwana kanəŋ atà, bokuba takəsa kà vok aw, kà atà la uwana takəsa kà vok ndzer. ²³ Azlamanabay uwana takəsa à anu vok aw, məgod kà, atà la uwana məfa à atà sləm kayakay, manabay ziruwı gə uwana məhad atà à ahəŋ la huma yewdi aŋa azladza kà, məkəs atà kà la ahəl səla. ²⁴ Azlamanabay uwana takəs anu à gəl kayakay, atà kà mənəkudə aŋa mahad

atà à ahəŋ aw. Zəzagəla ahamà gay à vok à vok gesina, avàh à azlamanabay bəzaga masləkaway gesina. ²⁵ Kà uwana asal kà maŋoŋuzay aŋa magay la ahəŋ la vok aw. Ama kà matsən vok gay aŋa magay la ahəŋ la tataka azlamanabay aŋa vok la abà gesina aŋatà. ²⁶ Baŋa manabay tekula azay kà, azlamanabay gesina tazay la slaka gà. Baŋa tekula aŋatà la marabay la abà, gesina aŋatà tarabay la slaka gà suwaŋ, bay.

²⁷ Akul gesina kà, akul vok aŋa Kristu, ŋgaha kəla uwabeyuwi aŋkul kà manabay aŋa vok uwaga. ²⁸ Kiya uwaga à uwana, Zəzagəla avàh sləray à azladza la maham à ahəŋ məna gay Zəzagəla. Teraŋa: azlaməna masləlay, masəla: azlaməna mapəh à atà gay à ahəl aŋa Zəzagəla, kà mapàh à azladza, ŋgaha mamakər aŋha: azlaməna matapla tatak à azladza anik, la lig la ahəŋ: azlaməna maɖàh azlanadzipo, ŋgaha: azlauwana la maslay kà mawar azlaməna ɖuvats ala, ŋgaha: azlaməna mazlak à azladza anik anik, ŋgaha: azlauwana tadala azladza anik anik la tetəvi delga la ama, ŋgaha: azlauwana la maslay kà mapəh azlagay mələk gà, uwana azladza anik tasəl aw. ²⁹ Gesina aŋatà kà azlaməna masləl atà, baŋaw azlaməna mapəh à atà gay à ahəl aw, baŋaw azlaməna matapla à azladza aw. Gesina aŋatà kà atà la maslay kà atà aŋa maɖahàh azlanadzipo aw, ³⁰ baŋaw kà mawar azlaməna ɖuvats ala, ŋgaha la mapəh azlagay mələk gà aw, baŋaw la masàh ala godega aŋa azlagay uwaga à uda aw. ³¹ Kiya uwaga kà yàhàwàni mavày uwana aɖuwa vok

zlà.

Ama lagonay kà, gəpəhakulla tetəvi uwana aduwa vok gesina.

13

Tatak uwana aduwa vok gesina kà: Masal

¹ Iyay, agayŋa gəsəl azlagay gudəŋ aŋa azladza gesina, amiyaka bə aŋa azlamalika, ŋgaha ma-woy dza gulo la ahəŋ aw kà, kiya uwaga kà gəpaka kà kalkal la mahohumay aŋa dewdew uwana azay la sləm la abə pəra. ² Amiyaka gədəgay la maslay kà maz paŋaw aŋa Zəzagəla à azladza, amiyaka bə gədəsəlay tatak gesina, gədəsəlay godega aŋa nasiri aŋa Zəzagəla, gədədiŋ gəl à Zəzagəla à vok la tsəhay gə, uwana gəslala vok aŋa magodəy à gudəŋ: Bəda vok ala la abanay, ama baŋa gəwoyən azladza anik aw kà, gədəpaka tatak deyday pəra. ³ Gədəvəh azlatatak gulo à uda gesina babay, amiyaka bə gəl gulo bay kà maβək à gay la akəl, ama baŋa gəwoyən azladza anik aw kà, makəs vok gulo la ahəŋ aw, gədəpaka tatak deyday.

⁴ Dza uwana la masal, masla abasiŋ azladza anik, masla adəh delga, adəh adi aw, ats zlapay aw, azigəŋ gəl aw. ⁵ Masla masal kà, adəh sləray ziruwi gə aw, masla afa à gəl kà vok aŋha pəra aw, masla ləv aw, apəh gay lakəl aŋa mawisiga aŋa dza aw, la maf dza à ləv aw. ⁶ Masla arabay kà sləray mawisiga aw, ama arabay kà, kà sləray delga. ⁷ Masla uwana la masal kà, abas tatak gesina, madiŋal gəl à vok aŋha, la manewəŋ aŋha, la mabasiŋ aŋha atetuway dikiŋiki aw.

⁸ Masal kà adəv à gay aw, mapəhay aṅa Zəzagəla uwana apəh à azladza à ahəl kà mapah à atà kà, adədəv à gay à baṅa məlo aṅha adàslay. Azlagay gudəṅ aṅa azladza gesina, uwana məpəhay kà, adədəv à gay babay, bə masəl tatak gami uwana məsəl tatak babay kà adəzahla. ⁹ Kà uwana masəlay gami, la mapəhay gami kà uwana məz paṅaw aṅa Zəzagəla uwana apəh à anu à ahəl kà ahən ala babay aw. ¹⁰ Ama mok uwana tatak ahən ala gə adàsa à waṅ kà, tatak uwana ahən ala aw kà, adəziyla gesina.

¹¹ Mok uwana gi bəziga kà, gəpəhəh gay bəzi, gədzügwaḥ ṅgaha gənawəhəṅ mabəzi bəzi, ama mok uwana gədagay magolga, gəsək à tatak azlabəza la tsəh ala gesina. ¹² Lagonay kà, mənəṅəṅ kà bokuba fatew uwana la kutərum la abə, mənəṅəṅ la dziriga aw. Ama kaslè adàslay à uwana mədənəṅ Zəzagəla yewdi la yewdi. Lagonay kà, gəsəl kà gəl gə gəl gə pəra, ama la kaslè uwatà kà, gədəsəlay la lela bokuba uwana masla uwana asəl gi babay.

¹³ Lagonay kà, tatak makər uwaga la uwana tagədəṅ à afik: Madiṅal gəl à vok, manewəṅ, ṅgaha masal. Ama masal la uwana aduwa azla-tatak anik anik gesina la kaykay.

14

Gay anik lakəl aṅa mavàṅ aṅa Masasəḍok Zəzagəla

(Rom 12.1-13; 1 Korintiya 12.1-11)

¹ Wəḍəw vok à uda kà akul aṅa magay la masal, wəyàwwəṅ la ləv tekula! Mavàṅ uwana

Masasəfok Zəzagəla avàhà à azladza, kà akul aña mabəzal suwan. Uwana wòyàwwàñ, gəgodf à akul, kaykay kà, maslay aña mapəhla gay Zəzagəla à azladza uwana Zəzagəla apakullan. ² Masla mapəh gay məlok gə, uwana azladza anik tasəl aw kà, say apəhay kà à Zəzagəla pəra, kà uwana dza asəl gay uwaga aw. La ndzəfa aña Masasəfok Zəzagəla dza apəh nasiri. ³ Ama dza uwana az pañaw aña Zəzagəla, uwana apəhal kà, azigənəñ kà azladza la madiñal gəl à vok la abà, kà madzərəfàh atà à uda, ñgaha kà mataslàh atà à gay à ahəñ. ⁴ Dza uwana afaɗma la azlagay məlok gə, uwana azladza anik tasəl aw, adzərəfəñ kà madiñal gəl à vok aña à uda pəra. Ama dza uwana az pañaw aña Zəzagəla, uwana apəhal kà mapəh à azladza kà, avà ndzəfa à məna madiñal gəl à vok la maham à ahəñ məna gay Zəzagəla gesina.

⁵ Asa à gi, kà akul gesina kà kavatsaw gay la azlagay məlok gə, uwana azladza anik tasəl aw. Ama uwana gəyahay kaykay aya kà, akul aña mabəz maslay aña maz pañaw aña Zəzagəla uwana apəh à azladza à ahəl. Haɗay kà, dza uwana av sayda uwaga kà, uwaga la uwana akəsa vok à dza, uwana asəl azlagay məlok gə, ñlèm kà say masla mawulla à uda aga la ahəñ, kà madzərəf azlaməna madiñal gəl à vok ala. ⁶ Azladedə, gənava akul: La mok uwana gədàda à awtày à slaka añkul, la mana gədəkəs à akul à vok, à baña gədāvats gay kà la azlagay məlok gə uwana azladza tasəlaw ma? Gədəkəs akul à vok aw, say baña gədàsa akul à uda dziriga aña

Zəzagəla, baŋaw gəpəhakulla tatak anik anik, baŋaw masəlay anik anik, baŋaw sayda uwana mabəzal gə la slaka Zəzagəla, baŋaw matapla anik anik.

⁷ Dzugwàw lakəl aŋa azlatatak matsay kà aŋa marəzlay tsi, bokuba talakway baŋaw ŋizin, baŋa masla matsay la masla maďəďay tava kuda aŋha aw ma kakay dza asəl mahabal à tsəh lela ma? ⁸ Baŋaw, baŋa masla mats mazlazliŋ aŋa guvəl atsay lela aw ma, uwa ada à guvəl uwa? ⁹ Kiya uwaga la slaka aŋkul babay, baŋa kapəhaw gay mələk gə, uwana dza asəl aw, kakay dza atsən uwana kapəhaw ma? Aŋa kiya uwaga, kà gay aŋkul uwana kapəhaw kà, adagay gay deyday bokuba maďəďay aŋa afad. ¹⁰ Aga la ahəŋ azlagay gərgagər la gudəŋ la vok, kəla tsəhay uwala beyli kà la gay aŋha. ¹¹ Ama baŋa gətsəna gay uwana dza apəh à gi aw kà, dza uwana apəh à gi gay uwaga kà gədəpakiŋ ala kà, kà dza mələk gə la slaka gulo, ŋgaha gi babay gədəgay mələk gə la huma aŋha suwaŋ. ¹² Tsa akul kà, kavàw ndzəďa à azlamavàw uwaga zlə kà, yàhàw aŋa magay gorobu kà aŋa azlauwana tadala maham à ahəŋ məna gay Zəzagəla à huma à gay la maďiŋal gəl à vok la abà zlə.

¹³ Kà uwaga baŋa dza la maslay kà mavats gay la azlagay mələk gə, uwana azladza anik tasəl aw kà, say dza uwaga anav maslay la slaka Zəzagəla, kà mav maslay kà masəlla godega aŋa azlagay uwaga à uda kəla babay suwaŋ. ¹⁴ Baŋa gədəv kudfa la gay mələk gə uwaga kà, ləv gulo adəv kudfa ndzer, ama haŋkəli gulo adəv kudfa aw. ¹⁵ Tsa baŋa kiya uwaga ma, mana

gədehəŋ zlə ma? Gədəv kuda la masasəfok gulo, gəhab uwaga kà la haŋkəli gulo babay aya. ¹⁶ La kità, baŋa kadəv kuda à Zəzagəla la masasəfok ma, kakay dza masla matsəbal sləm uwana la maham gay vok aŋkul la abà, adàslala vok à magodəy: 'Amen!' à madəv kuda aŋak ma? Kà uwana asəl à uwana kapəhay tetuwa aw. ¹⁷ Amiyaka madəv kuda aŋak adagay dzəba aŋha səla aw babay kà, akəsa la vok aw.

¹⁸ Kikay gəgod à Zəzagəla kà uwana gəduwa akul gesina la masəl gay mələk gə, uwana azladza anik tatsənaŋ aw. ¹⁹ Ama la huma maham à ahəŋ məna gay Zəzagəla kà, asa à gi mapəh gay zlo uwana tatsəna, kà gi aŋa madzadzəŋ azladza anik ala, à kà mapəh gay dəbow dəbow, uwana azladza anik tasəl aw.

²⁰ Azladedə, kadzugwaw bokuba akul azlabəza aw, à uwana dzüğwəw bokuba akul azlamagol dza. Kà madəh mawisiga kà, gəw bokuba azlabəza uwana tasəl madəh mawisiga aw.

²¹ Agay uwana tatsətsèr à wakitə Zəzagəla à abà: 'La azlagay mələk gə uwaga à uwana gədəsahla à tsəhay gulo à uda. Ama bə la uwaga kà, tatsiŋgəŋ la ahəl aw',[☆]

Sufəl Zəzagəla agòf. ²² Kà uwana maɓadma la azlagay mələk gə kà, adəpakay kà bokuba nadzipo la slaka azladza uwana tadiŋəl gəl à vok aw, kà atə aŋa masəlay kà, atə la maham gay à vok la abà, la azlaməna madiŋəl gəl à vok aw. Ama maz gay Zəzagəla, kà mapəhla paŋəe aŋa Zəzagəla ala la slaka aŋa azlaməna madiŋəl gəl

☆ **14:21** 14.21 Yesayya 28.11-12

à vok, ama kà aṅa azladza gesina suwaṅ babay aw.

²³ Bokuba magoḍḍay kà, maham à ahəṅ məna gay Zəzagəla gesina adahama gay à vok, ṅgaha gesina aṅatà tadzəka mavats gay kà la azlagay məlok gə pəra: Baṅa azladza deydayga, uwana tadiṅal gəl à vok aw, tada à awtəy à maham gay à vok aṅkul à abà, ṅgaha tatsən uwaga kà, tanərəz akul kà bokuba akul azlakusoṅu aw, takay? ²⁴ Ama baṅa kəla uwabeyuwi az sayda aṅa Zəzagəla, ṅgaha dza deydayga, uwana masla madiṅal gəl à vok aw, ada à awtəy babay kà, kiya uwaga kà, kəla gay uwana adətsənəṅ kà, adəpəhla tsakana aṅha. Gay uwaga gesina kà, adəkəsəy lakəl. ²⁵ ṅgaha madzugway uwana la tsəh ləv aṅha gesina, adàsa à uda à uḍaka ala, ṅgaha adəwulla à gəl à vəḍfah kà masləkaw Zəzagəla la magoḍḍay kà: ‘Ndzer, Zəzagəla la ahəṅ la tataka aṅkul la abà!’, agoḍḍay.

Uwana akəsa vok la maham gay à vok la abà.

²⁶ Azladedə, mana à uwana gəpəh à akul lagwa ma? Mok uwana kahamaw gay à vok la slaka gə, dza anik azəḅ mahabay, ahab. Dza anik atapla gay Zəzagəla à azladza anik. Dza anik atsala à atà tatak uwana à uda, Zəzagəla apəhla. Dza anik aya à masla maḅadma la azlagay məlok gə, ṅgaha dza anik atsala godega aṅa gay uwaga à uda apəhay. Kəla tatak uwana kaḍahawwaṅ kà, say agay delga, azlaməna gay Zəzagəla tazigəṅay la masla kəla. ²⁷ Kà aṅa azlagay məlok gə kà, səkàw kà azladza səla pəra tapəh, ama dza awulla à uda uwana

tapəhay, ɲgaha la manəf vok lela, aduwa dza makər aɲa mapəhay aw. ²⁸ Ama baɲa masla mawulla gay uwaga à uda la ahəɲ aw kà, masla mabadma uwaga adza à ahəɲ titi, apəh uwaga kà la ləv aɲha la tsəh, atà la Zəzagəla aɲha pəra. ²⁹ Ama kà aɲa azlaməna maz paɲaw aɲa Zəzagəla, uwana apəh à atà kà, azladza səla baɲaw makər tapəh gay uwaga, ama say azladza tamədzedəɲ ala uwana tapəhay. ³⁰ Zlahaw kà, la kaslà uwana dza abadma la uwana, dza anik uwanay abəza gay la slaka Zəzagəla kà, ɲuləm matera adza à ahəɲ dadàɲ. ³¹ Akul gesina kaslawwala vok aɲa maz gay aɲa paɲaw aɲa Zəzagəla la manəf vok la tekula tekula, ɲgaha azlaməna madiɲal gəl à vok gesina aɲa masəlay, ɲgaha madiɲal gəl à vok aɲa uwa-beyuwi aɲa mazigənay. ³² Azlaməna mazàh paɲaw aɲa Zəzagəla tanəɲla gəl aɲatà la huma aɲa Masasədok, uwana Zəzagəla avà à atà. ³³ Zəzagəla kà asal anu mədza à ahəɲ la sehseh la abà aw, ama mədza à ahəɲ la lapiya la abà.

Bokuba uwana adapaka zagəlà à azlaməna madiɲal gəl à Zəzagəla à vok gesina, ³⁴ kiya uwaga la maham gay à vok aɲkul la abà babay. Say azlamis tadza à ahəɲ titi, atà la tetəvi kà mavats gay aw, bokuba uwana tatsetsèr à wakità mapəhay aɲa Zəzagəla à abà: Say tasləkaway pəra. ³⁵ Baɲa asa à atà matsən tatak anik kà, say tanàvəh à zil aɲatà la mtəga, kà uwana uwaga kà, ziruwi kà aɲa mis aɲa mavats gay la huma maham à ahəɲ mənə madiɲ gəl à Zəzagəla à vok.

³⁶ Iyay, awma la slaka aɲkul la uwana gay

Zəzagəla asa à uda kagodəw takay? Awma kà aṅkul pəra à gay uwanay kagodəw ay?
³⁷ Baṅa dza adzugw kà masla aṅa magay masla maz sayda aṅa Zəzagəla, baṅaw adzugw kà, kà adabəza ndzəda aṅa Masasədok Zəzagəla, delga, masla asəlay kà uwanay gətsetser à akul, kà mapəhay aṅa Sufəl Zəzagəla. ³⁸ Ama baṅa asəl aw kà, kafaw sləm à masla aya aw.

³⁹ Kiya uwaga azladedə gulo, mawoyəṅ aṅkul kà aga kà aṅa maz sayda aṅa Zəzagəla. Ama kasakawwalla tsəh ala aṅa mapəh azlagay mələk gə aw. ⁴⁰ Say tatak gesina ada à vok la tetəvi aṅha, bokuba uwana akəsa vok lela.

15

Mawul à uda aṅa Kristu

¹ Azladedə gulo, vəw gi tetəvi kà gi aṅa mawulla à akul ala gay marabəṅ uwana à gəl gəzakullaṅ, kakəsaw uwaga, madiṅal gəl à vok aṅkul atsizl kà à uwaga à afik. ² La uwaga la uwana kabələw, baṅa kakəsawwaṅ bokuba uwana gəzakulaṅ aw kà, madiṅal gəl à vok aṅkul apakay kà tatak deyday pəra.

³ Gay uwana aga la gi lakəl kà, gədapəha à akul à vok à abə suwaṅ. Aganay gay uwana gəpəh à akul dadəṅ: Kristu kà aməts kà, kà à ahəl tsakana gami bokuba uwana tatsetsər à wakitə à abə.✧ ⁴ Tallə masla, ṅgaha awul à uda la mamətsay la mahənay maməkər, bokuba uwana tatsetsər à wakitə Zəzagəla à abə aya.✧

⁵ Masla apèhla vok à Piyer, ngaha à azlamèna matapla kulo gəl aṅha sèla uwatà bay. ⁶ La lig la ahəṅ apèhla vok à azlamèna asik, uwana aduwa dadərmokw zlo. Azlaanik aṅatà kà atà la ahəṅ tsəràh à lakana, ama azlaanik aṅatà kà tamatsay. ⁷ La lig aṅa uwaga la ahəṅ, apèhla vok à Yakuba, ngaha à azlamèna matapla gesina.

⁸ Ngaha la lig aṅatà la ahəṅ gesina, apèhgəla vok bay, à gi uwana gəga bokuba bəzi mahəṅay aw gə. ⁹ Aya gəga matsihila gə aṅa azlamèna matapla anik uwanay gesina. La dziriga kà, gəsla aṅa magay masla matapla aṅha aw, kà uwana gi la uwana gətərəbàhà azlamèna mat-salah sləm aṅa Sufəl Zəzagəla à gay gesina. ¹⁰ Ama la vok mahamay aṅa Zəzagəla adapakagəla, à dza uwana kanəṅàwwàṅ lagwa, la vok mahamay aṅha lakəl gulo kà apakà deyday aw. Gəfahà sləray aṅuvaw daduwa à gay aṅa azlamèna matapla anik gesina, uwaga kà gi gəfahàṅ aw, ama vok mahamay aṅa Zəzagəla uwana la gi la abà. ¹¹ Adagay gi, adagay atà, anu azlamèna matapla gesina, anu məzà gay marabəṅ bokuba uwana gəpəh à akul, kiya uwana kadìṅàwwalla gəl à vok babay.

Mawul à uda gami la mamətsay

¹² Aganay maz sayda gami uwana məpəhay. Zəzagəla awùlla Yesu à uda la mamətsay. Ngaha ma kakay azlaanik aṅkul tagodfay kà: Azlamazimnekidf tadàwul à uda aw, tagodf ma? ¹³ Baṅa mawul à uda la mamətsay la ahəṅ aw kà, kità kà Yesu Kristu babay kà awul à uda zlà ma aw. ¹⁴ Baṅa Kristu awul à uda aw kà,

mapəhay gami babay kà apakà tatak deyday, ngaha madiᅇal gəl à vok aᅇkul babay kà deyday suwaᅇ. ¹⁵ Uwana azay aduwa uwaga kà, madfah fida gami à Zəzagəla à vok, à uwana məgodf kà, awulla Kristu à uda la mamətsay. Hadfay, baᅇa azlamazimnekidf tawul à uda aw kà, kità kà awulà à uda suwaᅇ zlà ma aw. ¹⁶ Kà uwana baᅇa azlamamatsay tawul à uda aw kà, kità kà Kristu kà awulà à uda babay aw. ¹⁷ Kà uwana baᅇa Kristu awulla à uda aw kà, madiᅇal gəl à vok aᅇkul akəs sləray aw, akul azlamazəhla gə la tsakana aᅇkul la abà, tsərah à lakana. ¹⁸ Tsa kità kà, azlauwana taməts à madiᅇal gəl à vok à abà babay kà, tazəhla. ¹⁹ Baᅇa manewəᅇ gami kà lakəl aᅇa Yesu, kà aᅇa sifa uwanay anu la abà lakana kà, kità kà, anu la uwana vok ahama azladza anik uwanay gesina, kà anu.

²⁰ La dziriga kà, Kristu awulà à uda la mamətsay, kà uwaga à uwana azladza gesina tadəwul à uda. ²¹ Kiya uwaga à uwana mamətsay asà à waᅇ à gudəᅇ à vok kà dza tekula, kiya uwaga babay mawul à uda la ahəᅇ kà dza tekula aya suwaᅇ. ²² Azladza gesina tamatsay, kà uwana anu tekula la Adama. Gesina aᅇatà tadəwul à uda kà maham gay à vok aᅇatà la Yesu suwaᅇ. ²³ Ama kəla mana beymi la tetəvi aᅇha: Kristu la uwana aga matera aᅇa mawul à uda. La mok uwana adəsa à waᅇ, azlaməna madiᅇal gəl à vok gesina tadəwul à uda. ²⁴ Kiya uwaga kà, makədf gəl à ahəᅇ adəsa à waᅇ: Kristu adəkalah azlandzəfa ala la maslay gesina, ngaha la azlamaslay aᅇa azlaməna məzam aᅇa

Zəzagəla gesina bay. Nğaha adàvə makoray à ahàl aña Zəzagəla Baba, ²⁵ kà uwana leri Kristu adàkoray kà say baña Zəzagəla adàbək azlaməna məzam à tsəh aña dən.✧ ²⁶ Masla məzam makəđ gel à ahəñ, kà uwana Zəzagəla adàkalah à ahəñ, kà uwaga kà mamətsay. ²⁷ Kà uwana tatsetsər à wakitə Zəzagəla à abà, tagòđ kà:

'Zəzagəla abək tatak gesina à tsəh asik, kà maf asik à afik aña.'✧

Baña tagòđ kiya uwanay kà, ndzer kà, Zəzagəla kà aga la tsəh aña Kona aña aw, kà uwana masla la uwana abək azladza à tsəh asik aña Kristu. ²⁸ Baña Kona aña Zəzagəla adagay masla makoray à azlatatak gesina kà, masla aga la tsəh aña Baba aña, uwana afàl tatak gesina à ahàl, kiya uwaga kà Zəzagəla Baba adàkoray tatak gesina

²⁹ Dzùgwàw lakəl aña azlagay anik tsi. Azladza anik la ahəñ la maham à ahəñ aňkul la abà, uwana tadəhà à atə batem kà aña azlamazimnekiđ uwana tamatsay tsi. La dziriga, baña azlamazimnekiđ tadəwul à uda aw, ma mana madəh batem uwaga akəs vok ma? ³⁰ Anu ma, kà mana məda à huma à gay koksikoksi la ahàl aña mamətsay zlà ma? ³¹ Azladedə gulo, gəzləb akul kà, kà uwana akul la ahàl aña Sufəl gami Yesu Kristu, ama gi kà, kəla mavakay gesina kà, gi la kuda mamətsay. ³² La gudəñ Efesus kà, gəpə slagəla mənğa bokuba map slagəla la azlatatak fəta makəsafərga. Agayña gəgay la manewəñ

✧ 15:25 15.25 Mahabay 110.1 ✧ 15:27 15.27 Mahabay 8.6

aŋa mawul à uda aw kà, naka uwaga akəs gi vok aw, hadfay! Baŋa azlamazimnekiď tadàwul à uda aw kà, ŋuləm mənəfa tetəvi uwanay: 'Məzùw, məsà kà uwana lebəŋ kà mamətsay atsa à waŋ.'[☆]

Gay la gay la abà agodf.

³³ Kapapataw gəl aŋkul aw, mədza à ahəŋ la dza mawisiga awis madz à ahəŋ delga aŋkul ala. ³⁴ Wùlàw à waŋ à dziriga à abà bokuba uwana Zəzagəla ayahay, ŋgaha sàkàw à madàh tsakana, gəpəh uwaga kà ziruwi aŋa makəs akul, uwana gəpəh uwanay kà, azladza anik la ahəŋ la tataka aŋkul la abà tasəl Zəzagəla aw.

Vok aŋa azlauwana tawul à uda la mamətsay

³⁵ Zlahaw dza anavay: 'Kakay azlamamatsay tadàwul à uda ma? Vok ma uwala tadàkoray la?' ³⁶ Kayyà, kak la haŋkəli aw! Baŋa kaslək fofulo, ŋgaha fofulo uwatà amətsay dadàŋ, la uwana à uwana atsa à uda. ³⁷ Fofulo uwana kasləkay adagay hi, adagay uwala beyli, kasləka kà fofulo gə pəra, awkà kasləka kà mas à uda gə aw. ³⁸ ŋgaha Zəzagəla atsalla à uda, av tsəhay à fofulo gesina tsəhay bokuba uwana asal. Kəla fofulo gesina abəza tsəhay vok aŋha.

³⁹ Sləb vok aŋa azlatatak uwana la sifa kà gərgəgər. Vok aŋa azladza kà gərgəgər la vok aŋa azlatatak fəta, ŋgaha babay vok aŋa azlatatak mahoyay kà gərgəgər la vok aŋa azlatatak fəta, ŋgaha babay vok aŋa azlatatak mahoyay kà gərgəgər la aŋa azlakilfi.

[☆] **15:32** 15.32 Yesayya 22.13

⁴⁰ Azlatatak uwana la zagəla la afik la azla-uwana la vədfah babay la ahəŋ. Mazləbfay aŋa azlatatak uwana la zagəla kà gərgər la aŋa azlatatak uwana la vədfah babay. ⁴¹ Afats kà la mahədfay aŋha kokuda gəl aŋha, təla babay la aŋha, ŋgaha azlatsetsiliŋ babay la aŋatà, ama azlamahədfay aŋatà kà gərgagər.

⁴² Kiya uwaga la uwana adapaka vok la azlaməna mawul à uda la mamətsay. Uwana tala kà azinla, ama uwana awùl à uda kà azinla aya aw. ⁴³ Uwana talà kà maŋəratata gə ŋgaha mawisiga. La mok uwana adawul à uda kà la ndzəfa ŋgaha la mahədfay kayakay. ⁴⁴ Uwana talà kà vok uwana la sləb vok, ama uwana awùl à uda, kà vok aŋa Masasəfok. Baŋa sləb vok aŋa vok la ahəŋ, vok aŋa Masasəfok la ahəŋ babay. ⁴⁵ Kà uwana wakità Zəzagəla agòd kà:

'Adama teraŋa, aga la sifa',[☆]

ama Adama masəla, uwaga kà Kristu, aga Masasəfok uwana avà sifa. ⁴⁶ Uwana aŋa Masasəfok la uwana atsa vok à waŋ aw, ama aŋa vok. La lig la ahəŋ aŋa Masasəfok asa à waŋ. ⁴⁷ Adama matera kà, agà maŋalay gə kà la kiriniŋ aŋa kutso, ama Adama masəla kà, asà à ahəŋ kà la zagəla. ⁴⁸ Azladza aŋa vədfah kà kalkal bokuba Adama, uwana asa à uda la kiriniŋ aŋa kutso la abà. Azladza aŋa zagəla kà, atà kalkal la dza uwana asà à ahəŋ la afik babay suwaŋ. ⁴⁹ Lagwa kà mədebani à vok la dza uwana taŋəl la kutso, kiya uwaga bay mədàdebani à vok la dza uwana asà à ahəŋ la zagəla la afik.

[☆] 15:45 15.45 2Musa 2.7

⁵⁰ Aganay uwana asa à gi mapəhay azladede: Tatak uwana tafahəŋ la sləb vok, ŋgaha la aniz taslala vok aŋa mad à makoray aŋa Zəzagəla aw, ŋgaha vok uwana amətsay babay, aslala vok aŋa madz à ahəŋ la sifa aw.

⁵¹ Gəpəh à akul nasiri anik: Gesina gami mədà-məts à gay aw, ama mədàgohla vok pəra. ⁵² La katskats, la kirim yewdi, à mok uwana mazlazliŋ adətsənay, haday, la mok uwana adətsənay, azlamazimnekiɔf tadəwal à uda kà aŋa sifa la vok, uwana amətsay aya aw. Ŋgaha anu uwana la sifa bay mədàbədla vok. ⁵³ Bokuba magodəfay kà, vok gami mamətsay gə uwanay, kà adətsokw vok, uwana à abà amətsay aya aw. ⁵⁴ Baŋa uwaga adəpaka vok kiya uwanay kà, gay aŋa masla mapəhal gay ahəl adagəɔf à afik: 'Mamətsay la ahəŋ aya aw, takəɔasl à mamətsay adagay, tsewwa.

⁵⁵ Kak mamətsay aŋala ndzəɔa aŋa uwana la? Kak mamətsay aŋala ndzəɔa aŋa matsəh gi anək uwana ala? ☆

⁵⁶ Ndzəɔa aŋa mamətsay kà la tsakana la abà, ŋgaha ndzəɔa aŋa tsakana kà asa à uda, kà la mapəhay la abà. ⁵⁷ Ama mazləbay aga la Zəzagəla uwana avà à anu maduwiŋ la Sufəl gami Yesu Kristu.

⁵⁸ Kiya uwaga zlə, azladede gay ləv gulo, tsizlləw à ahəŋ lela lela, rəɔf kagodəw aw, fəw gəl à sləray aŋa Sufəl Zəzagəla koksikoksi, kà uwana kasələw kà, mabasiŋ ankul uwana la Sufəl Zəzagəla la abà kà, adətəɔf à vəɔah deyday aw.

16

Matsatsàh sili

kà mazlakla azlaməna madiṅal gəl à vok la Urusalima

¹ Lagwa kà, gəzalaṅ à gəl gay ṅuv, lakəl aṅa sili uwana mətsatsàh kà aṅa azladedə gami la Urusalima: Bokuba uwana gəpəh à azlaməna manəfay la kutso Galatiya bay. ² Kəla ladu gesina, delga, kà kəla uwabeyuwi aṅkul afa sili à fəta à awtəy bokuba uwana asla. Dahàwwaṅ à ahəṅ lela tsərəh à uwana gədà à awtəy. Kiya uwaga kà, mədànekudə aṅa mahamala gay à vok la kaslè uwatà aya aw. ³ Baṅa gədàda à awtəy gədəsləl azladza aṅkul uwana katsatsamawani atà à Urusalima la wakità la ahəl, kà madla sili uwana kazlakawla atà. ⁴ Baṅa mazlakay aṅkul kà asla kà gi aṅa maday la gəl gulo kà, mədàday anina pəra zlà.

Manewəṅ aṅa Pol

⁵ Kà maḃəz à slaka aṅkul kà, gədzugw maguway la Makeduniya dadəṅ, kà manəṅ azladedə anik à gay la abatà. ⁶ Zlahaw gədàdzan à ahəṅ la slaka aṅkul ṅodegi la təla awkusa gesina, kiya uwaga kà, kadàzlakaw gi la tatak uwana gənəkudə aṅha gesina, asa à gi maday. ⁷ Gi kà, asa à gi aṅa madz à ahəṅ la slaka aṅkul, awkà asa à gi aṅa manəṅ akul la tetəvi la ama pəra aw. Gədzugw madz à ahəṅ la tataka aṅkul la abà, à baṅa asa à Zəzagəla.

⁸ Kèla kà, asa à gi madz à ahəŋ la abanay la Efesus tsərəh à mavakay aŋa Pentakosta, ✧ ⁹ kà uwana la abanay kà, gəbəzà maslay kà maɖàh sləray uwana akəs vok. Bə amiyaka azlaməna məzam la ahəŋ aŋuvaw babay.

¹⁰ Baŋa Timotawus adàda à awtày kà, kəsàw masla la ahəl səla, kà masla aŋa madz à ahəŋ la tataka aŋkul la abà kokudà guba. Kà uwana masla babay masla sləray aŋa Sufəl Zəzagəla bokuba gi. ¹¹ Kamkam, dza apəsew aw, zlakàw tsərəh à uwana adəv mauguzahay aŋha à gay gesina, ŋgaha kà masla aŋa mawul à waŋ à slaka gulo la marabay. Gi, la azladedada la abanay kà, məkud mas à waŋ aŋha.

¹² Ama kà aŋa deda gami Apolos kà, gədàdzərəɖəŋla kaykay, kà masla la azladedada anik aŋa mad à awtày à slaka aŋkul, ama asəl mad à awtày lagonay aw, say la huma à gay ŋuv, à baŋa adàbəza kaslà.

Ayyi aŋa makəɖ gəl à gay

¹³ Kadzewhal aw, dzàw à ahəŋ la adi lela la maɖiŋal gəl à vok la abà. Gàw maβələfa la ndzəɖa. ¹⁴ Uwana kaɖahawwaŋ gesina kaɖahawwaŋ kà la masal.

¹⁵ Azladedada kasəlaw Estefanas la huɖ gày aŋha. Atà kà azlaməna maɖiŋal gəl à vok teraŋa la kutso Akayya. Ŋgaha atà taɖàh sləray aŋa Sufəl Zəzagəla la ləv tekula, kà mazlak azlaməna maɖiŋal gəl à vok. ¹⁶ Kamkam azladedada, gədəv akul kudà, kà akul aŋa makəs azlaməna sləray

✧ **16:8** 16.8 3Musa 23.15-21; 5Musa 16.9-11

uwaga la ahàl sèla. Atà la azladza uwana tadfàh sléray atà nna kaslökawaw atà.

¹⁷ Gi la marabay mənğa kà mas à waŋ aŋa Estefanas la Fortunatus, ŋgaha Akayyikus à slaka gulo. Baŋa gədanəŋ atà, kà bokuba akul gesina aŋkul la slaka gulo. ¹⁸ Atà tadukwğəŋ ləv à ahəŋ, bokuba uwana tadukwakullaŋ à ahəŋ babay. Kəsàw tsəhay dza uwaga la ahàl sèla.

¹⁹ Azlaməna madiŋal gəl à vok la makoray aŋa Asəya gesina ‘Ayyi’, tagod à akul. Akilas la Pərəskila, la maham à ahəŋ mənə gay Zəzagəla, uwana tahamàh gay à vok atà nna tadfahakulla ‘Ayyi’, la sləm aŋa Sufəl gami Yesu. ²⁰ Azladedə uwana la abanay gesina tadfahakulla ‘Ayyi’.

Dahàhàw vok ‘Ayyi’, kà akul à akul gesina la mənğa mənğa, ŋgaha la ahàl sèla.

²¹ Aganay uwana gətsetseray la ahàl gulo à gi Pol, ‘Ayyi’, gəgod à akul.

²² Baŋa dza awoya Sufəl Yesu aw kà, matsafla gə!

Marana tha, (Asal magodfay: Sufəl gami: Sà à waŋ!) ²³ Sufəl Yesu Kristu avà à akul vok mahamay aŋha.

²⁴ Mawoy akul gulo gesina agay koksikoksi la akul, akul uwana la Yesu Kristu la abà.

**Wakità Zəzagəla Wakitə Anja Makəs Vok
Slawda Mawga (Cameroun)
Matal: Wakitə Zəzagəla Wakitə Anja Makəs Vok
Slawda Mawga (Cameroun) (New Testament)**

copyright © 2019 Wycliffe Bible Translators, Inc.

Language: (Matal)

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 21 Feb 2024 from source
files dated 29 Jan 2022

03efbf2f-98ca-5534-8610-0be3a8c4b974